


LESA WABULUME

WASOLOLWA KWI ATWEBA

 Njina Binembelo bicheche byanembwa, kabiji Nakeba kwamba kwi anweba kufuma mu, kabiji Naketekela mba Lesa usakupesha nyingijilo yetu ya bumuntu.

² Pano, bantu bavula bakumya kika kyo twayikela bantu bapusanako kabiji baji na kyongo bingi. Mwayukatu, awe ke musango ungi wa—wa mbung'eno ikatampe yapusanako na—na yo bamona kimye kyonse. Kabiji, javula, bintu byonse ke musango wa byapusanako-mu-ngubilo. Bino umvwe twaiya kuyiye mbung'eno ikatampe, ajo jaikala ke jishuko jami pa myaka yavula kufuma ku kimye po kyatatwiletu, kabiji kechi tuyuka ne kuyuka nangwa pachechetu kyo tukooba ne. Twiyatu atweba ne kwipana atweba bene. Akyo kyokyoka kintu kyotwayuka kuuba. Kabiji Lesa uba byashala. Nanchi akyo kitulengela kwikala bantu babyubilo-byapusanako.

³ Juba jikwabo, muntu umo waambile mba, “Mwayukatu, anweba bantu kine mwibapusanako.”

Naambile mba, “Kyawama, Na—Naketekela mba byobyo tuji.”

⁴ Kabiji Navuluka ku mbung'eno imo ikatampe. Mulongo Troy wa mbujilenga kimye kimo pa mwina German awo waambile mba watambwile lubatizhilo lwa Mupashi Wazhila. Kabiji juba jikwabo ja londejilepo, mushitolo moasebezelenga, wasutwilenga maboko anji kabiji ne kutakaika Nkambo, kabiji ne kwaamba mujimi ingi kabiji ne kutwajijilatu, byalubankana. Kabiji kupelo, bakulumpe bamingilo bayishile ne kwaamba mba, “Heini, lukatazho ka louji nalo?”

⁵ Aye waambile mba, “Oo, Amiwa napuluka.” Aye waambile mba, “Muchima wami mwayulatu lusekelo.”

⁶ Aye waambile mba, “Kyawama, kyamweka nobe wayile kookwa nakutanwa na joja jibumba ja manati.”

⁷ Aye waambile mba, “Ee. Lukumo lwikale kwi Lesa!” Waambile mba, “Twasachila aye Nkambo pa manati.” Aye waambile mba—aye waambile mba, “Anweba musenda motoka, ne kuya mu mukwakwa.” Waambile mba, “Mwafumyako manati onse ku motoka, kafwako kyo mujinakyo ne ke mulumbatu ‘walumbama.” Kabiji akyo ke . . . Akyo kiji nobe kijitu bulongo, mwayukatu.

⁸ Juba jimo, mu California, Nayilenga mu mikwakwa ya mu Los Angeles, kabiji Namwene muntu wajinga nakiyukilo

pa kyaaji kyaji, kabiji *ne papo*. Kabiji kyanembelwe mba, “Amiwa ne kileya wa Kilishitu.” Kabiji bonse bamutajilengatu pe aye. Kabiji Nebamwene kasa babena kwaluluka na kumutala, byo apichilenga. Kabiji Nalangulukile mba Nsakwibalondaizha bonse. Kabiji pa . . . panyuma yanji, panembelwe mba, “Obewa wikileya wakwa ng’anyi?” Ee. Naketekela mba atweba bonse twi bantu bapusanakotu, umo ku mukwabo, mwayukatu.

⁹ Bino, mwayukatu, ntanda yonse itwela mukakololongwa, posotu kintu kimo kyapusanako kyalengela kwikala muyewa musango, poso bantu batatula kulanguluka mba kintu kimo kyalubakanako. Kabiji javula Lesa ubapo kintu kimo kibula kumwekamweka, pakuuba mba abwezhe bantu jibiji ku Baibolo.

¹⁰ Nakonsha kulanguluka mba Nowa wajinga nobe—nobe nati, kuyoya nkulo ya sayaasi yo ayikelemo, mambo bakonsheshe kupima amba kafwako mvula mwiulu ne. Bino Lesa waambile mba ikekalako. Nanchi, Nowa, pakusapwila ne kuketekela kyokyo, waikele ke nati.

¹¹ Kabiji Nfwainwa kulanguluka mba Mosesa byo ayile kokwa ku Ijipita, aye wajinga nobe musango wa—wa nati, kwi Felo. Pano vulukai, Felo wajinga nati, kwi aye, ne aye. Nanchi abo . . . Twavuluka kyokyo.

¹² Ne Yesu naye bamumwene nobe wavulang’anako. Abyo ibyo. Martin Luther wajinga ke nati, ku kipwilo kya Katolika. Kabiji John Wesley wajinga nati, ku kipwilo kya ba Anglican. Nanchi, mwayukatu, kya—kyajinga pepi nobe kimye kya nati ikwabo. Kechi mulanguluka byobyonyeni? Bino, kasa kukyanye kwikala nati, mwayukatu, kwafwainwa kwikala bbautu, patanshitu, pa kwikikasa kwi akyo.

¹³ Nanchi, mwayukatu, Nowa, byo ajinga nati, aye . . . Kisenda nati, pa kudoosa bbautu, pa kukokela kintu pamo, kabiji ne kukwata kintu pamo. Nanchi, Nowa wakonsheshe kudoosa bonse bafwainwa kwitabila, kutwela mu bwato, ne kufuma mu luzhachisho, byo ajinga nati.

¹⁴ Twatana, mba, Mosesa wa doosele kipwilo kufuma mu Ijipita, mambotu akwikala nati. Abyo ibyo.

¹⁵ Naketekela mba tubena kukeba nati pakino kimye, pa kudoosa Musongwa kufuma mu kipwilo. Tubena kukebapo kintu kimo ponka pano, ne mukwabo, nanchi twi bantu bapusanako bingi. Kabiji Nakulanguluka, bufukku buno, inge Nkambo waswa, Nakonsha kweseka kutanga Binembelo bimo byatala kukikye, kabiji ne kwamba kwi anweba pa bimye bichechetu, ne kweseka kwi mumweshwa ene mambo kyo twayikela bantu bapusanako bingi.

¹⁶ Twayai tuzhikule mu Binembelo pano, ku Filipayi kyapitala kyabu 2, 1-8, ne Kolinda Wakibiji 3:6. Kabiji twayai tutange, byo twaketekela Kyambo kya Lesa.

17 Kabiji pano, saka tulyangye kutanga, twayai tukunyiike mitwe yetu mumilombelo.

18 Taata Walusa Wamwiulu, twi bantu kine bashukwa bingi, bufuku bunu, pakwikala na bumi muino nkulo, kabiji ne pakumona bintu byo tubena kumona na kubiwa, kabiji ne kuyuka mba kimye kyafwenya ke pepi, kimye Yesu po akeya na kulonda Kipwilo Kyanji. Oo, akyo kileta lusekelo ku michima yetu, Nkambo! Kabiji byo tubena kuzhikula bipepala, bufuku bunu, twalomba mba Musakwitupa Kishina kufuma mukino kibaba. Kabiji aye Mupashi Wazhila asolole ku michima yetu bintu byafwainwa kuwama ne kumusekesha Lesa. Mambo twaipuzha bino Mujizhina ja Yesu. Amena.

19 Mwayukatu, naketekela Nsakwimwipuzhako kuba kintu kimo. Ami—Ami bimye byavula ngipuzha bintu byenyi, kabiji Naketekela kechi Mbena kwipuzha kintu kyaikesha kyenye ne. Pakuuba umvwe twaswa kukokela mbandela, atweba bonse twimane. Kabiji—kabiji ne mbandela byo ipita pepi, twimana; akyo, twafwainwa kuuba. Kabiji twimana, mukupana munema. Twayai twimaneko mukimye kyo tubena kutanga Kyambo, inge mwakonsha, Kolinda Wabubiji 3:6.

Ye. . . wituba tukonshe kwikala ke bamingilo ba mu lulayang'ano lupya; kechi ba binembelotu ne, nanchi ba mupashi: mambo binembelotu bipayang'ana, pakuuba mupashi upana bumi.

Bino umvwe—bino umvwe awa mwingilo wa lufu, ye banembele na kumankaula pa mabwe, wajinga wa lukumo, lwa kuuba mba baana ba Isalela kechi bakonsheshe kutajijisha pa kilungi kya Mosesa ne mambo a lukumo lwa kilungi kyanji; lonka lwayilenga na kuzhimang'ana:

Nanchi awa mwingilo wa na mupashi akabulwe byepi kuuba lukumo lwakila?

Mambo umvwe mwingilo uleta luzhachisho wajinga na lukumo, nanchi awa uleta bololoke wakijishamo mu kuleta lukumo.

Mambo kine awa nangwa wajinga wa lukumo kechi uji na lukumo ne, pa kulanguluka mambo a loluno lwakila.

Mambo umvwe awa wapichilengatu wajinga nalukumo, byepi. . . pano kine kabiji awa waikala kikupu wakila kwikala na lukumo.

Onkao mambo pa kwikala na luketekelo lwa byonkabyo, twaamba ng'ambilo yapeela kumvwa.

kechi tuji pamo ne Mosesa ne, wabikile mbutwa pakilungi kyanji, kuchina mba baana ba Isalela bakatajijisha ku mpelo ya lolwa lwasakile kuzhimang'ana:

Nanchi michima yabo yakoseshiwe: mambo kufika ne ku jino ja leelo pakutanga lulayang'ano lwa kala yonkaya mbutwa ikiji ponka; aya mbutwa yazhimang'ana mwi Kilishitu.

Kabiji kufika ne kujino jaleelo, ponse ponse pa kutangwa ma buuku akwa Mosesa, mbutwa ikiji ponka pa michima yabo.

Nangwa byonkabyo byo ikalulukila kwi Nkambo, mbutwa ikamvwetulwapo. Kechi . . .

Bino Nkambo ye yewa Mupashi: kabiji kuji Mupashi wa Nkambo, ko kuji ne bwaana bwa bene.

Pakuuba atweba bonse, bilungi kasa byamvwetulwa kasa tumona lukumo lwa Nkambo nobe mukatajilo, tubena kwalulwa mukipasha kimo kyonka kufuma kulukumo lumo kuya kulukwabo, monka molufumina ku Mupashi wa Nkambo.

²⁰ Kabiji mu Filipai 2, tutanga bibye, kutatula na wabu 1, kabiji kutanga kufika pa veleeshi yabu 8.

Pakuuba—pakuuba kana muji bukwasho mwi Kilishitu, kana muji lutekenesho lwa butemwe, . . . kana muji lumvwang'ano lwa Mupashi, kana muji bumuchima wanekena ne bya lusa,

Fikizhai lusekelo lwami, mwikale ba milanguluko imo, ne na butemwe bumo, mwikale ba kujila mumo, ne ba muchima umo.

Kechi mube kintu nangwa kimo mu kwilanguluka anweba bene nangwa mu kwitota kwatu ne; poso na muchima wipelula kasa mulanguluka bonse pa muntu pa muntu amba mukwetu wankila mu kuwama.

Kabiji bonse pa muntu pa muntu kechi muteshe muchima kubintu byenu byonka ine, kana muntu yense ne . . . ku bya bakwenu pamo.

Ikalai na ye uno muchima mwi anweba, yenka waji mwi Kilishitu Yesu:

Aye, nangwa waikajile mu musango wa bu Lesa, kechi walangulukile mba kwesakana na Lesa kechi kintu kya kwesakana na Lesa kyo kintu kyakukakachila ne:

Bino wialwile mwine nobe ke watutu, pa kutambula musango wa buzha, ne kwialula ke wa mukipasha kya bantu:

Kabiji byo amwekele mu bumuntu, wipelwile mwine, wakokejile ne ku lufu, nalo lo lufu lwa pa musalabo.

²¹ Twayai tulombe.

²² Taata Wamwiulu, akye Kyambo kikatampe kyatangwa, bufuku buno, kufuma mu Byanembwa Byenu Byzahila, kilengai

Kikale kitutulu mu michima yetu, kya kuba mba tusakufuma kuno nobe boba bailenga ku Emasa, kwaamba mba, “Bushe michima yetu kechi yajikutemanga byo Twajikwisambanga naji pakuya mu mukwakwa nenyi?” Mambo twaimpuzha bino Mujizhina ja Yesu. Amena.

Anwebwa ikalaiko.

²³ Pano, akye ke kishina kyapusanako, bino Nalanguluka mba kyayikala kyafikilamo bingi pakino kimye. Nakukebanga kwaamba pa mutwe wa: *Leswa Wabulume Wasololwa Kwi Atwebwa*.

²⁴ Bino, kufuma pa kimye kyayikeleko muntu, kwikala zala mu muchima wa muntu, kukeba kuyuka koafumine kokwepi, kabiji ene mambo oayikelako oepi, kabiji ubena kuyapi. Kujitu Umo wakonsha ku kumbula kyokyo, Ao Yeyeka wamuletele pano. Kabiji muntu kimye kyonse ukebatu kumona Lesa.

²⁵ Kubwela ku Lulayang’ano Lwakala, twatana mba Lesa wifiiile Ayemwine ku babula kwitabila. Lesa uji najishinda japusanako bingi ja kwingijilamo na bantu. Aye wifya Ayemwine ku babula lwitabilo ne kwisolola ku balwitabilo. Lesa uba kyokyo. Yesu wasachichijile ba Shanji, amba, Aye wibifya abye bintu ku bamana ne bamilangwe, kabiji ne Kwibisolola ku balukeke bonka bafwainwa kufunda. Nanchi, twatana mba Lesa kechi ukingya ne, mu misango Yanji, kabiji Aye wingilatu mingilo Yanji mu musangotu umo. Twatana mba, mu Malakai 3, Aye mo a ambile mba, “Amiwa ne Lesa, kabiji kechi Kingya ne.” Nanchi, Aye wingijila mutachikilo imo, kimye kyonse.

²⁶ Pano twatola umo wa mu mabuuku akala kene a mu Baibolo. Kimye Yoba, umo wa bantu baoloka ba mu kimye kyanji, muntu walumbuluka mu mizhilo yakwa Lesa, kalume, wafukilamo, kalume wa mushingi, posotu Lesa waamba mba, “Kechi kujipo uji nobe aye ne, panopantanda ne.” Bino. . . nkebelo yanji, kimye kimo, yajinga ya kukeba kumona Lesa. Aye wayukile mba koanji Lesa, kabiji watundayikilwe kukeba kumumona Aye, nangwa, nobe, kuyatu ku nzubo Yanji na kukokosha pa kibelo, ne kwaamba mba, “Nasaka kwisamba ne Anwebwa.” Kwikala panshi, ne kwisamba Nanji, byonka byo akonsha kwisamba na muntu mukwabo.

²⁷ Tunji na buyuke. Oene mambo kyo twikela na bipwilo bya mimba, apo potwiya pamo ne—ne kusolola milanguluko yetu. Kabiji—kabiji tunji na buyuke umo ne mukwabo, bulongotu, umvwe tubena kwaamba bintu umo ne mukwabo. Kabiji ba mingilo boba kyokyo. Bantu bamisango yonse be kyuba, ne kwisamba pa bintu.

²⁸ Kabiji, Yoba, Lesa wajinga wakine kine kwi aye, aye wakebelenga kuyuka kana kechi wakonsha kuyako ne, na kukokosha pa kibelo Kyanji, kabiji—kabiji na—najinga Naji na misambo ya kumwipuzha.

²⁹ Bino twatana mba Lesa wisambile nanji, nangwa byonkabyo Aye wifiiile. Aye wifiiile mu musango wa kazhimbiji. Kabiji wamubujile Yona mba anyingishe mukifuka kyanji; Aye waambilenga kwi aye, nobetu muntu. Kabiji wayishile mu kazhimbiji ne—ne kwaamba ne Yoba. Kabiji wayukanyikilwe kwi Yona kupichila mu kazhimbiji, nangwa byonkabyo kechi wa Mumwene ne. Aye waumvwinenga mwela kasa abena kumpupa na kuzhokoloka, mu binchi. Kabiji ne Jiwi jafumine mu kazhimbiji, bino Lesa wifiiile monka mukazhimbiji.

³⁰ Twatana mba, monka mu Africa, South Africa, bengijisha kyaambo kya *amoyah*, kyalumbulula mba, “bulume bubula kumweka.”

³¹ Kabiji abwe Bulume bubula kumweka, mu kazhimbiji, bwajinga na Jiwi jumvwanika. Jaambile kwi Yoba, nangwa byonkabyo kechi wamumwene musango Wanji ne. Bino Aye wifiiile, kwi aye, monka mukazhimbiji.

³² Twatana umo mukatampe ngauzhi wa mu Baibolo, Mosesa, wa mu Lulayang’ano Lwakala, umo wasalululwa kwi Lesa, wasalwa, bakalume batongwejiilwe jimo, ne aye wankebele ku mumona Aye. Aye wajingatu pepi kwi Aye, kabiji wamwene bintu byavula bingi bya kuboko Kwanji kubula kumweka na kumutangijila ne kuuba bintu byakonsha kubatu Lesa. Aye juba jimo wakebele mba na Mumone, kabiji Lesa wamwambijile mba, “Yanga, ukemane pa jibwe.”

³³ Kabiji mukimye kyo ayimene pa jibwe, Mosesa Wamumwene wapita. Aye wamwene kyanyuma Yanji. Kabiji waambile mba, “Yamwekele nobe ya muntu, nyuma ya muntu.” Nangwa byonkabyo, aye kechi wamumwene Lesa ne. Aye wamwenekotu mbutwa ya kwa Lesa.

³⁴ Aye Baibolo waamba mba, “Kafwako muntu nangwa umo wamwenepo Lesa ne, poso yeka umotu Wasemwa kuba Shanji ye Wamusolola.” Nanchi, Mosesa wa Mumwene, wifiiile, nobe Muntu. Twatana mba Yehoba wa mu Luyang’ano Lwakala wajingatu ke Yesu wa mu Lulayang’ano Lupya.

³⁵ Kabiji—kabiji Dr. Scofield papo, twatana mba, kyambo kyanji, kupipulwa kwa “musango wamwenkelo.” Twatana kyambo kya *en morphe*, mu Kigiliki, kya lumbulula mba “Awa ubula kumweka wamweka.” Kintukimo akyo kibula. . . Twayuka mba kokiji. Kyakonsheka. . .kechi kyakonsheka kumweka ne, bino kasa twayuka mba kokiji. Kabiji Aye byo apipwile musango Wanji, wa bu *en morphe*, kibena kulumbulula mba Aye wapipwilwe kufuma mu musango wakilapo ne kuya mu kintu kyabumubiji.

³⁶ Kabiji Aye wapipwiletu mwenkelo Yanji, mu musango mukwabo, kijitu pamo nobe bantu bakaya bisela. Aye wajinga mukisela. Kabiji mu Kigiliki, inge bapipula mwenkelo yabo,

kapepo umo ukay-. . .umo ukaya bisela wafwayijilwe kutanwa mu bibese byavula bya kisela.

³⁷ Kabiji mwaanami wamukazhi, uji muno, bajinga pa sukuulu wamukatampe, ki—kisela. Kabiji nsongwalume umo ye Nayuka, watainwe mubibese bina, bino wayilenga kunyuma yakwa kukayila ne kupipula yanji—yanji mwenkelo, pakuuba mba afumeko, eye kupashang’anya mwenkelo ikwabo.

³⁸ Bino, umvwe mwatola bungauzhi bwa mu Lulayang’ano Lwakala kutazha ku Mesiyasa byo afwanyijilwe kwikala, mwakonsha kwi kyesakanya pamo na bumi bwa Yesu, kabiji mujinakyo byonkatu Yesu byo ajinga. Aye kechi wajingatu muntutu ne. Aye wajinga Lesa, *en morphe*. Aye wapipwilwe kufuma—kufuma mu musango wakukumya kuya mu musango wamwenkelo ya bu Muntu. Nangwa byonkabyo, Aye wajinga Lesa, wamwekela mu mubiji, wawwetwa na bumuntu, kipembe kya mubiji wamyama ne mashi.

Kabiji tajishai mu Lulayang’ano Lwakala.

³⁹ Na—Na—Nayuka namba Mbena kwaamba kujibumba jivwanganamo bantu, bufuku buno, kufuma ku mapuzha apusanapusana a inontanda. Kabiji tuji pano pakuuba mba tutaane. Atweba tubena—atweba tubena kuuba byepi? Yetu—yetu bang’anyi? Tubena kuyapi? Kika kibena kumweka? Abye byonse byalumbulula ka?

⁴⁰ Kabiji twatana, muno, amba, umvwe anweba banabalume ne banabakazhi ba Kiyudeya, kabiji balabbi mu—mu—mu tempo, mu moba apitapo kunyuma, inge kwajinga kulondela Baibolo, bya kwaula, mukifulo kya byakisho, bafwajijilwe kuyuka amba Yesu ye ng’anyi. Abo inge kechi bamutelelele Aye amba Zelebabuba ne. Abo inge kechi Aye bamupopele ne. Bino, mu byonse wakaile. Alo lo lubaji lwa kisela. Kabiji abo bapofwelwe meso, pa ao mambo.

⁴¹ Kijitu pamo nobe anweba banabalume, banabakazhi, muno bufuku buno, mwafwainwa kwikala pamo myaka ne amiwa nangwa mwakilako. Vulukai, muno mu America, myaka yapita kunyuma, kasa bakyangye. . .Abo ma Chinese. . . Mulongo wami, akyo byo kyaletelwetu muno, akyo kyayishile mu milanguluko yami kimye kyo Nesambilenga naji. Byo baubanga. . .Abo kechi baambanga Kizungu ne, kabiji ba—bajinga na landule wakuwamisha byakuwala. Kabiji umvwe mwaya ku yuwe landule, pa kuuba mba bawamishe byakuwala byenu. Abo—abo Machineese bengijila kulandule batolanga kiyukilo, kabiji bekitabulanga mujishinda jamusango umo. Wasendako lubaji lumo lwa kyokya kiyukilo; aye naye wasendako lubaji lukwabo. Pano umvwe mwabwela amba musende bipe byenu, atwa tuyukilo tubiji twabipepala twafwainwa kunungakana bulongo. Kabiji inge byabula kunungakanatu bulongo ne. . .Obewa kechi wakonsha

kwikipashang'anya mujishinda jiji jonse ne, mambo a kuuba mba aye wajingako nalubaji lumo ne obewa na lubaji lukwabo. Kabiji umvwe kyajinga kya kupashang'anyakotu. . . Apo obewa uji nasambu yakukeba bipe byobe. Kabiji popo ukekala na bipe byobe, inge obewa watanwa na lubaji lukwabo lwalolwa lulayang'ano.

⁴² Nanchi byoyo kiji, bufuku buno, umvwe tuji nalubaji lukwabo lwalolwa lulayang'ano. Kimye, Lesa kyo a abenye Wanji Mwaana mu bibese bibiji, pa Kalvali, kutwala mubiji peulu amba ekale ke Kitapisho, kabiji ne kutuma Mupashi pano panshi kwi atweba, ao kimye kimo waikele mu Mwanamulume, Yesu. Awa yeka Lesa umo uji mikipembe bufuku buno, mu musango wa Mupashi Wazhila. Abya bibese bibiji byafwainwa kwiya pamo, apo popo ukekala lubaji lwalolwa lulayang'ano. Lesa waubile kikye, pa kuuba mba ayukanyikwe bulongo ku muntu, Aye byo elengele Ayemwine ke Muntu.

⁴³ Natangilenga jishimikila, myaka yapita kunyuma. Kabiji mujije jishimikila, jaambile mba mukatampe, wamunema mfumu. . . Nalubamotu jizhina janji, ponka panotu. Amiwa kechi naji kulanguluka amba sakwambapo pa jishimikila ne. Akye, kape kyakufwanyikizhatu, bino kibena kwitupako buyuke bwa kyo tubena kukeba kwambapo. Awe mfumu, wajinga mfumu wamunema bingi, kabiji ke muntu watemwa bantu banji, poso, juba jimo, kumeso aba—aba malonda banji ne babinemanga banji, wibambijile mba, “Leelo, musankumona japelako, pa myaka yavula.”

⁴⁴ Kabiji bamalonada banji ne binemanga banji ba mwaambijile mba, “Mfumu wawama, kika kyo mubena kwambila kyokyo? bushe mubena kuya mu kyaalo kingi nyi, kuntu kumo ako komukekala mwenyi?”

⁴⁵ Aye waambile mba, “Ine. Amiwa sakwikalatu monka muno. Kyawama,” waambile mba, “Mbeni kuya nakwikala mukachi kabantu bami. Amiwa sakwikalatu ke ne muyanji. Amiwa sakuchibangatu kunyi na kya kuchibilako kunyi. Amiwa mbeni kuya na—na kujima mushiji nabobo bamanama. Amiwa sakuya na kuwamisha mu bipangwa na boba bawamisha mu bipangwa. Amiwa sakwikala umo wa mwiabo, pa kuuba mba amiwa kwatakanye bulongo abya byonka byo boobapo. Kabiji ne Batemwa. Kabiji Nakeba kwikala nabo kyabaya, amiwa mwine. Abo kechi bakangyuka ne. Bino, nangwa byonkabyo, Nasaka kwikala nabo, mujoja jishinda.”

⁴⁶ Kabiji lukeelo lwalondejilepo, kimye babinemanga banji, bonse bantu banji bamumwene, nangwa mba aba bajinga mu kipango, wavujile kisocho kyanji kya bufumu kabiji wikutujile mukipona, pa jitanda; kabiji wavujile mukangyo wanji, ne kuvwala bya kumvwala bya bayaji, ne kwenda pamo na bantutu.

Pano, mujije jishimikila jicheche, twatanamo byatala pe Lesa.

⁴⁷ Abo baambijile ba mfumu, amba, “Mfumu, tubena kwimukeba. Twimutenwa. Atweba—atweba twimukeba mba mutwajijiletu kwikala bamfumu.” Bino aye wakebelenga kwikala umo wa mwiabo, ne kwibayukisha bulongo, amba ne abo bamuyukishetu bulongo, musango ye ajingamo. Kikamweshwa kwi abo musango aye ye ajingamo.

⁴⁸ Kabiji abyo Lesa byobyo aubile. Aye—Aye wialwile Ayemwine, kufuma mu bu Yehoba Lesa, kwiya kwikala umo mwi atweba, pa kuuba mba Aye amaname, Aye atompe lufu, Aye ayuke lumuna walufu byo anji, kabiji ne kusenda malipilo alufu Ayemwine. Aye watujile kulubaji Kyanji—Kyanji kisochi kya bufumu kabiji ne mukangyo Wanji, ne kwikala umo wa mwiatweba. Waovwele mauulu pamo na—na—ba babula munema. Aye wayikelenga mu mateete, na bayanji. Aye walaajile mu—mungye ne mu mikwakwa, naboba babujilwe munema. Aye waishile kwikala umo wa mwiatweba, pa kuuba mba Etuyukishe bulongo, kabiji amba ne atweba Tumuyukishe bulongo.

⁴⁹ Pano, Nalanguluka mba, mu kyokyo, akwa kwaluka, Ayemwine, byobyo Aubile. Inge mwamona, Aye wayishile mu mazhina a bwaana busatu. Aye wayishile mujizhina ja Mwaana muntu, kabiji mu Mwaana Lesa, kabiji ne Mwaana Davida. Aye wayishile nobe Mwaana muntu.

⁵⁰ Pano, mu Ezikyo 2:3, Yehoba, Ayemwine, waichile Ezikyo, ngauzhi, “mwaana muntu.”

⁵¹ *Mwaana muntu* kyalumbulula “ke ngauzhi.” Aye wayishile muyewa musango, pakuuba mba afikizhe Mpitulukilo ya mumizhilo 18:15, po aambile Mosesa mba, “Aye Yehoba Lesa wenu ukemanya ngauzhi mukachi kenu wampasha amiwa.” Aye kechi witelelepo Ayemwine mba Mwaana Lesa ne. Aye witongwelenga Ayemwine amba, “Mwaana muntu,” mambo wafwaijilwe kwiya monka mwayila Kinembelo. Monai? Aye wafwaijilwe kulenga alwa lubaji lubiji lwa kipepala kya tabuka, abwa bungauzhi bwa Lulayang’ano Lwakala ne byubilo Byanji Ayemwine, pa kuuba mba bilinganetu bulongo. Nanchi, Aye wayishile, Mwaana muntu, wayishile muyewa musango.

⁵² Kabiji twatana mba, panyuma yakufwa Kwanji, ne kuzhikwa, ne lusanguko, Aye wayishile pa Juba ja Pentekositi, nobe Mwaana wa Lesa; Lesa, Mupashi, mu musango wa, Mupashi Wazhila. Aye Waubilenga ka? Aye wialwilenga Ayemwine, kwiyukisha Ayemwine ku bantu Banji mu musango wapusanako. Nobe, Mupashi Wazhila, ao ye Lesa, Aye wayishile kwingila na mankulo abipwilo, nobe Mwaana Lesa, aye Mapashi Wazhila.

⁵³ Pa kuuba, mu Myaka kiumbi kimo, Aye ukeya nobe Mwaana Davida, ne kwikala pa jitanda jakwa Davida, Mfumu. Aye

ukasenda jitanda jakwa Davida. Aye ukiji pa jitanda ja Bashanji pakino kimye. Kabiji nanchi Aye waambile mba, “Aye undondela panyuma ukekala pamo ne Amiwa pa jitanda Jami, byonka byo Nashijile ne kwikala pa jitanda ja Ba Taata.” Nanchi, Aye, mu Myaka kiumbi kimo, Aye ukekala Mwaana Davida. Kyo kika? Aye ye Lesa umotu, kimye kyonse, kijipotu ke kwalula Yanji—Yanji mwenkelo.

Amiwa, ku bakazhi bami, ke ne mulume.

⁵⁴ Bushe mwamona nyi? Aye mwanamukazhi mwina Saifolisha waambile mba, “Anweba Mwaana Davida, ngubilai lusa.” Aye, kechi Wamukatezhepo, nangwa pacheche ne. Awa kechi wajingapo na luusa lwa Kumutela byobyoby ne. Awa kechi wajingapo na sambu pe Aye ya kwamba mba Mwaana Davida ne. Aye wajinga . . . Aye ye Mwaana Davida, ku Muyudeya. Kabiji pano Aye wayishile . . . Bino aye byo Amutelele mba, “Nkambo,” Wajinga Nkambo yanji, popo atambwile kyo aipwizhenga.

Pano, nobe, byo abena kwialulatu Ayemwine.

⁵⁵ Bino, mu nzubo yami, Amiwa ne musango wa bantu basatu. Mu nzubo yami, mukazhami waamba mba amiwa ne mulume wanji. Mwaanami wamukazhi kokwa, aye kechi waambapo amba amiwa ne mulume wanji ne; Amiwa ne shanji. Kabiji mukanami wamucheche kokwa, Amiwa ne nkamboyanji, nanchi kechi ujipo na luusa lwa kutela mba ne shanji ne. Amiwa kechi ne shanji ne. Mwaanami ye shanji. Amiwa ne nkambo yanji. Bino Amiwa yami muntutu umo.

⁵⁶ Kabiji Lesa, byo Oba, Aye wialulatu Ayemwine, pa kufika ku kyokya kisemi, ke kwimweshwa Ayemwine kuboba bantu. Kabiji akyo kyotwaikela pano kuuba mba tuyuke, bufuku buno. Mujishinda ka Lesa jo afwainwa kwi yukisha Ayemwine kubaabo bantu kabiji mu kino kimye? Aye upipulatu mwenkelo Yanji, Aye upipulatu ngubilo Yanji, bino kechi upipula mwenkelo Yanji ne. Aye kechi upipula Yanji—Yanji mwenkelo ne. Aye upipulatu mwenkelo Yanji, kufuma ku musango umo ne kuya ku mukwabo. Aye wikyuba, kwisolola Ayemwine patokatu ku bantu, pa kuuba mba bamuyuke amba Ye nanyi, kabiji ne byo Anji.

⁵⁷ Mu Bahebelu 1, tutanga mba, “Lesa, mu bimye byakala ne mumapuzha mwapusanapusana waambile ku bashakulu, kupichila mu bangauzhi, pa kuuba mu ano moba apelako kupichila mu Mwaana Wanji, Yesu.”

⁵⁸ Bino, “Abo bangauzhi,” Yesu waambile mba, kimye kyo Ajinga panopatanda amba, “bajinga balesa. Mwibatela amba ‘balesa,’ abo Kyambo kya Lesa ko kyayishile. Kabiji Binembelo kechi byakonsha kulalwa ne,” Aye byo a ambile. Aamba, “Pano mwakonsha ku Muzhachisha byepi, Aye kasa aji Mwaana Lesa?” Mwamona?

59 Akye Kyambo kya Lesa kipewa ku kila nkulo, byo Kikekala. Kabiji Yesu wajinga kufikizhiwa kwa bonse bungauzhi. “Mwi Aye mo mwayujile kuyula konse kwa Bulesa mu mubiji.” Wajinga mwi Aye. Aye wajinga Yewa wajinga mwi Yosefwa. Aye Ye Yewa wajinga mwi Elaija. Aye Ye Yewa wajinga mwi Mosesa. Aye Ye Yewa wajinga mwi Davida, mfumu ye bakaine.

60 Bantu banji ayemwine bamukaine, nobe mfumu. Kabiji byo alupukile mu—mu kipango, pachechetu, wamanyikilwe mulunda na kuzhokoloka kasa akalaba, kechi watemenwe wanji—wanji kafulumende ne, tachikilo yanji, kabiji wa shipijilwe. Kabiji malonda wasomwene poko yanji, waambile mba, “Bushe Nakonsha kuleka mutwe wayewa kabwa, kasa ashipila mfumu wami?”

61 Kabiji Davida, kape kechi wayukile ne kyo aubilenga ne, bino wajinga washingwa manyi. Kabiji aye waambile mba, “Mulekaitu bunke. Lesa ye wamubuula kuuba kikyeye.” Kabiji wakajijile pa katumba ne kujila wajijile mambotu a Yelusalema, mfumu ye bakana.

62 Bushe mwamona nyi? Myaka ma aduleedi achechetu kufuma ku kyokya kimye, Mwaana Davida ke bamushipile mate, mu mikwakwa, kabiji wajinga pa katumbatumba, mutumba umotu, na kutala ku Yelusalema, Mfumu ye bakaana. Kabiji wajijile mba, “Yelusalema, jiinga jo ke Mufukamina nobe kyaje byo afukamina pa make anji, bino anweba kechi mwaswile ne!”

63 Aye kechi wapipwile musango Wanji ne, mambo Bahebelu 13:8 waamba mba, “Aye ujitu pamo keesha, leelo, ne myaka yonse.” Lesa walengelwe ke muntu, pa kuuba mba afwe, mu kwitukuula kububi bwetu. Oene mambo Aye kyo ealwijile Mwine, kwikala ke—ke Muntu.

64 Twamona, mu Yoano Wazhila 12:20, ba Giliki ba Muvwine. Pano, kechi kujipo muntu wakonsha ku Mumvwa kanatu muchima wa kebesha ku Mumona. Nobo Yoba ne bangauzhi bakala, bonse basakilengatu Kumumona. Nanchi, awe mu Giliki wayishile na ku Mumona. Abo bayishile kwi Filipai, wajinga wa ku Betesenda, waambile mba, “Mwane, twakeba kumona Yesu.”

65 Abo Bangiliki bakebelenga Kumumona, bino kechi ba Mumwene ne mambo Aye wajinga mu nzubo ya bumuntu Bwanji. “Lesa wajinga mwi Kilishitu, nsaabena kupwanya bapano pantanda ne Ayemwine.” Pano twamona kuuba mba, mu kikyeye, abo Bangiliki kechi ba Mumwene ne.

66 Kabiji monai abya byonka byambo Yesu byo aambile kwi abo, palutwe. Aye waambile mba, “Inge ne lukunwa kuponena mu mushiji ne, ufwu, wikalatu bunke bwanji.” Mu byambo bikwabo, abo kechi bakonsha ku mumona Aye ne mukwalulwa kwanji, mu mwenkelo Yoajingamo, mambo Aye wifiiile mu mubiji wa bumuntu. Pano awe lukunwa wa Wichi byo aponene mu mushiji, popo Akaleta mitundu yonse ya bantu. Aye watuminwe

ku Bayudeya, ee kine, pa kyokya kimye. Bino awe lukunwa wa Wichi wafwainwa kuponena mu mushiji; wafiile Lesa, mu mubiji wa bumuntu, ne kufiwa ku babula lwitabilo, bino kasa abena kwisolola ku baitabila.

⁶⁷ Mu Yoano 1, “Muntendekelo mwajinga Kyambo, kabiji akya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kya alukile ke muntu, ne kwikala wayikelenga muno mwetu, kabiji Aye twamumwene, yekatu umo Wasemwa kwi Shanji, wayulwa na lusa.” Pano, muntendekelo mwajinga Kyambo. Akye Kyambo ke milanguluko yasololwa.

⁶⁸ Muntendekelo, Aye kechi wajinga ne Lesa ne. Bino, kyambo kyetu kya mu Kizungu leelo ke *Lesa*, kyalumbulula mba “ke kintu kyo bapopwela.” Byokiji kilubankanya bingi milanguluko. Mwakonsha kulenga muntu kwikala ke lesa. Mwakonsha kwalula kiji kyonse ke ki lesa.

⁶⁹ Pa kuuba mu Lulayang’ano Lwakala, mu Ntendekelo 1, “Muntendekelo *Lesa*,” kyambo kyaingijishiwa ke, Elohimu. *Elohimu* kyalumbulula mba “aye watanwako-pabunke Bwanji.” Ngaalupusano lujipo pakachi ka kyambo kya Elohimu, ku kyambo kyetu kya kwaamba mba Lesa. *Elohimu* kyalumbulula mba “aye watanwako-pabunke Bwanji.”

⁷⁰ Atweba kuuba twatanwako-pabunke bwetu ne. Atweba kuuba twaikala wa bulume bonse ne, bulume bonse, utanwa konsekonse, wayuka byonse. Awe Elohimu usolola byonsebyo. Atweba kuuba twaikala byo byo ne. Kinchi kyo mwalula ke lesa, nangwatu—nangwatu kinshimikwa, kechi kyaikalako pa bunke-bwakyone.

⁷¹ Nanchi, Lesa, muntendekelo, mwajinga Bumi, Aye Wapenape. Mwi Aye mwajinga milanguluko, kabiji ayo milanguluko yaikela Byambo, kabiji ne akya Kyambo kya alukile ke muntu. Yesu wajinga ke Mukuzhi. Kabiji *kukuula*, kyalumbulula mba, “kubwezha byo kyajinga.” Inge Aye wafwainwa kwi kibwezha, kyafwainwa kwikalako kutu kungi pa kuuba mba kibwezhiwe. Nanchi, mwamona, bantu bonse kechi bakonsha kwikimona ne, mambo bantu bonse kechi bajingako mu ntendekelo mu milanguluko yakwa Lesa ne. Mwamona?

⁷² Monai pa mapulisiti. Umvwe ba mumona Aye wisolola Ayemwine monka mwayila Kyambo, byo Ajinga, abo baambile mba, “Ke Belezebuba.” Akyo kyamwesheshe musango wa kitemwa kyabo. Kyajinga mu milanguluko ya bukatataka ya mu joja juba.

⁷³ Pakuuba aka kapite kakepa kamubiji, aka Koasambakene pa kibelo kyasakwa, kabiji wa mubujile, wamusolwejile kiyukilo kya bumesiya Bwanji, pa kumubula awa mwanamukazhi kyo aubile. “Kika,” waambile mba, “Mwane, Naketekela mba Anweba mwi Ngauzhi. Twayuka mba, aye Mesiyasa, byo

Akeeya, Uketubuula bintu byonse.” Aye wamutulukile mba Iye Mesiyasa, Awa mushingwa, mambo Wafikijilemotu mwayila Binembelo. Kechi mwi kimona nenyi? [Kipwilo kyaamba mba, “Amena.”—Waku.] Abya bipepala bibiji byasambakenenga pamo. Awa mwanamukazhi, “Twayuka mba, kimye Mesiyasa kyo akeeya.”

⁷⁴ Pano, Lesa wafwayijilwe kumvwangakanya *bibye ne byobya*, pakuuba mba kwikale awe musango wavumino ya mbelu, nobe mbumbi. Bino Yesu byo a alulukile, waambile mba, “Amiwa yami Iye wisamba nobe,” kechi kwajingapo aya ng’ambilo yakuba mba “Belezebuba ne.” Mwanamukazhi wanshile mulondo wani, ne kunyemena mumuzhi, kabiji waambile mba, “Iyai, mumone Mwanamulume Awo waambula bintu byo Nauba. Awe kechi Iye Mesiyasa nenyi?” Mwamona?

⁷⁵ Pano, ngakye kyaubile byepi? Kubika pamo Kinembelo kyakala ne kyo apichilemo akya—akya Yesu kyo amupelenga, kya ubile byepi? Kyalengele Mesiyasa. Kabiji mwamona nyi? Bukijibukiji, bubi bwanji bwalekejiwe, mambotu, ku ntendekelo, wajinga wafwainwa kukulwa, mambo wajinga mumilanguluko yakwa Lesa ku ntendekelo. Nanchi, kya mukujile, nangwa mba kumubwezha jibiji, byo amwene Kinembelo kyamwekanyika kusololwa, kya Yehoba, Aye byo ajinga, ne byo Anji.

⁷⁶ Bino, Yesu byo ayishile, inge wayishile na mbila yakwa Nowa, inge kechi kya ingijile ne. Kunshimika bwato, kabiji ne kutupauka, inge kechi kya ingijile ne. Bino awa Nowa wajinga kibese kya kwa Lesa. Aye waubijile mujishinda japusanako mambo wajinga wapusanako, kabiji mbila yanji yajinga yapusanako mambo kyajinga Kyambo kyasololwa.

⁷⁷ Aye kechi wafwayijilwe kwiiya na mbila yakwa Mosesa ne, mambo inge kechi yaingijile ne. Mosesa wajinga Lesa, mu kibese, kya sololwa. Aye wajinga kyambo kyamwekanyika kya mkyokya kimye, bino Yesu kechi wafwayijilwe kwiiya mu kyokya ne. Aye Baibolo kechi waambilepo mba Ukeya mujoja jishinda ne.

⁷⁸ Bino byo Ayishile, ne kwimweshwa byonkatu nobe—nobe Lulayang’ano byo lwaambile mba Aye byo akamweka, nanchi aba bonse bafwayijilwe kukulwa Bekitabijile, mambo bajinga milanguluko yakwa Lesa. Aya milanguluko Yanji yajinga ku ntendekelo, ya alwilwe ke muntu, kabiji wafwainwa kukulwa, kabiji wabwezhiwe jibiji kwi Lesa. “Mobavujila ba Mutambwile, abo ibo bo Apele luusa lwa kwikala ke baana ba Lesa,” mambo bajinga bafwainwa kukulwa. Abo bafumine ku ntendekelo, mu mwenkelo.

⁷⁹ Inge twakonsha ku kimanako kakimyetu kacheche, inge kyakonsheka kubiwa, ne kulanguluka pa kyokyo, bufuku buno, pa Mbila ya kimye, kumweshiwa kwa milanguluko

yakwa Yehoba. “Kitendekesho kya inontanda kasa kikyanye kwaalwa,” twabulwa mba, “mazhina etu abikilwe mu Buuku wa Bumi wa Mwaanamukoko.” Nanchi twakonsha kumona mbaji yonse ibiji, byonka byo Najikwaamba patanshitu, amba kika umo kyo ayikela wapusanako ku mukwabo. Kyafwainwa kwikala muyewa musango. Byokyajinga kimye kyonse. Byo kyajinga mu kimye kyonse, kabiji byo kikekala kimye kyonse. “Aye wajinga Kyambo. Kabiji akya Kyambo kyamwenkele ke muntu ne kwikala wayikele muno mwetu.”

⁸⁰ Bino, Lesa, mu...kunyuma mu moba a Lulayang’ano Lupa, twatana kuuba mba panyuma Yakumweka ku bantu Banji, mumisango yapusanapusana, Aye wifiiile Ayemwine kunyuma ya myayi ya banyama. Lesa kufyama kunyuma ya biseba bya banyama, ponka pa kipona kyalusa Kyanji. Twatana kuuba mba, Solomoni byo aubile, byo apesheshe nzubo ya Nkambo, kabiji abye biseba bya banyama kasa bipepela monka, akya kipembe, pano nga byo Ayishile nobe Mumbulungwa wa Mujilo kabiji nobe Jikumbi, kabiji wabwela kunyuma akwa, ne kwifya Ayemwine, ku ntanda ya pangye. Bino, ku lwitabilo, Isalela wayukile mba Uji konka kunyuma. Abu bayukile mba Uji konka, nangwatu mantanda a bantushi baamba bya musango ka. Aye wifiiile kuwabula lwitabilo. Bino waitabila, ku lwitabilo, wayukile mba Uji konka kunyuma. Bajinga na lusa. Kabiji Wajinga pa kipona Kyanji kyalusa, akyo kyajinga kyafyamika bingi.

⁸¹ Mwayukatu, mu Lulayang’ano Lwakala, kutwela kunyuma ya kyokya kiseba ke lufu. Pakino kimye kwikala kunyuma akyo ke lufu. Nanchi kutwela mu Lukumo Lwanji kyajinga ke lufu. Pano kwikala kwabula Lukumo Lwanji ke lufu. Kika kyamwekele, ee kine, pa kutabula kipembe ponka pa Kalvali, kipembe byo kyatabukile, kipembe kyakala. Bino kwikala kusa ya Kyeenyi Kyanji ke lufu. Kabiji kutwela mu Kyeenyi Kyanji kyajinga ke lufu. Mwamona? Kyalulwa kuya kulutwe ne kubwela kunyuma, kabiji wafwainwa kutaana Kinembelo pa kuuba mba tumone juba jo tubena kwikalamo.

⁸² Pano, kipembe byo kyatabukile pa Kalvali, kipona kyalusa kyashajiletu patoka. (Bino kika kyamwekele? Kyapepejilenga ponka pa Kalvali, na kusuma Mashi.) Byo batolele mashi, mwaka pa mwaka, pa komvwa mwazhila ne pakusasa kipona kyalusa, monka mwa, Lesa, na bulume Bwanji bukatampe kyeya kya ngovu kyasamine, kya tabwile kipembe kyakala kufuma peulu kufika ne panshi, kabiji kipona kyalusa kyamwekele patoka.

⁸³ Aye mwiine, Mwaanamukoko wa Lesa wakine kine wakobekelwe patokatu ponka pa Kalvali, Akyo kiine Kipona Kyalusa, Lesa byo alipijile malipilo, Ayemwine; kabiji waalulukile ke umo ne atweba, kabiji wisolwele Ayemwine nobe Muntu, pa kuuba mba etuyuke atweba, kabiji ne atweba pa

kuuba mba Tumuyuke. Aky a Kipona Kyalusa kyamwekelengatu kubonse bena Isalela pa joja juba ja Mfutoyamambo.

⁸⁴ Bino, nangwa byonkabyo, bisho bya kipwilo kya bashakulu mu joja juba, kupichila mu bisho byabo, bafiile Kipona Kyalusa kya bukine ku bantu. Inge banji bayuka Kinembelo, lubaji lumo lwa kisapi lwafwaijilwe kwiya pamo nobe kiyukilo kya ma Chinese. Abwa bungauzhi bwa Lulayang'ano Lwakala bwafwaijilwe kufikizhiwa, kabiji byo kyajinga. Kabiji umvwe bafunjishiwe Kinembelo, bafwaijilwe kumona Kipona Kyalusa. "Nobe Mosesa," waambile papo, amba, "kufika ne buji leelo bakiji na mbutwa. Yikijitu monka mumichima yabo." Abo kechi be Kimona ne.

⁸⁵ Bino, Aye wajinga Lesa, alwa lumanamo kabiji yo Mfutoyamambo. Aye wajinga Kipona Kyalusa kya kine kine kyayimene mu kumweka patoka. Byo ntusakwimbanga lwimbo:

Talai! Mumonai wamweka patoka,
Aye byo Anji, Kashinde wa bulume,
Kufuma Aye po atabwijile kipembe pabiji.

⁸⁶ Monai, Aye wayishile, Kipona Kyalusa, wakobamine na kumweka patoka ku kipwilo. Bino abo, byo bajinga mu milanguluko yaitabizhiwa kubavula . . .

⁸⁷ Bino, banabalume ne banabakazhi, ne bonse baiya ku ino mpwijilo ikatampe, Nasaka kwaamba kino kwakubula kutala pa muntu nangwa umo ne. Bino, byokiji mu buleelo, monka mwayila kyo twaendela kuno leelo, Amiwa naumvwa moyo amba bisho bya bashakulu, bashakulu ba bipwilo, bo baafya Abye bintu ku bantu bavula. Pano Mupashi Wazhila byo aiya mu ano moba akupelako, byonka byo kya awilwe, kabiji ne kipembe kyatabulwa, bantu bavula beseka ku kwachijijila ku bisho bya bashakulu babo. Oene mambo kyo bakonsha kubula kumwena alwe lusekelo lukatampe, ne mutende, kabiji ne bintu Kipwilo kyobiji nakyo leelo. Nangwa byonkabyo, Bijitu patoka kuboba baitabila.

Aye wafiile Kyambo, kya lailwa Kyambo kya mu jino juba.

⁸⁸ Bino, bisho bya lenga kipembe. Abo baamba mba moba abya kukumya apita. Mwanamulume umo waambile kwi amiwa, wawama, shetu wafunda bulongo mu Tucson, Arizona, ko Ngikala. Najinga na mbung'eno ku Ramada. Kabiji twaambilenga pa Kipwilo kya Business Men ako Nkambo Yesu ko ayishile na kwimweshwa kabiji waubile bintu bikatampe. Kabiji awe shetu Mwinakilishitu wayishile kwi amiwa, kabiji aye waambile mba. . . Wamwingilo wa mu kipwilo, muntu wawama, kabiji waambile mba, "Mulongo Branham, ubena kweseka kubuula bantu bya munkulo ya batumwa," waambile mba, "kabiji nkulo ya batumwa byo yapwile."

⁸⁹ Kabiji Naambile mba, "Nakulomba, mulongo wami, mwesheko kimye nkulo ya batumwa po yapwile, mu Binembelo."

Naambile mba, “Aya nkulo ya batumwa yatatwile pa Juba ja Pentekositi, kabiji yajinga na . . . Petelo waambile mba, pa Juba ja Pentekositi, ‘Awe mulaye walailwe kwi anweba, ne kubaana benu, kabiji ne kubonse banji kwa lepa, ne bonse mobavujila Nkambo Lesa wetu boaketa.’ Akye kypawile kimye ka? Inge Lesa ukita bantu, nanchi nkulo ya batumwa ya kitwajijilatlu.”

⁹⁰ Kabiji nanchi apo bantu pobeseka kupofula meso a bantu bavula, kupichila mu bisho bya bakulupe babo, byonka byo kyajinga pakyokya kimye. Kabiji mukakalwa kumona kika bantu kyo bekala na lusekelo ne kumvwa bulongo. Kabiji—kabiji aye mpwijilo ikala ya pusanakotu, ke kintu kyenye, ku bantu bakwabo, ke mambo akuuba mba bamona ne kupita mu byonse bimiko. Abo bapichile mu byobyo bipembe, ne kuya Mukyeenyi kya Lesa, umvwe bamona mulaye wasololwa wa kino kimye wasoloka konka kumeso abantu. Abo bamona abya Lesa byo alaile.

⁹¹ Mu Yowela 2:28, Aye walayile, amba, “Mu ano moba apelako kukekala mvula wakupelako *uketulwilwa* pa bantu, mu moba akupelako.” Nalanguluka mba kyambo kya mu ki Ngiliki paji *kenos*, akyo kyalumbulula mba Aye “wifumishemo” Ayemwine. Pano kechi mujishinda ja kwaamba mba, nobe pajipo kintu kimo kiji mukachi kamuntu umo, akyo kyo Aitulwilemo ne. Bino, Aye wifumishemo Ayemwine.

⁹² Aye waalukile; Waji *en morphe*. Aye—Aye waalukile, kufuma mu musango ye Ajingamo, kuya muyewa ye Ajimo. Aye kechi waluka musango wa byubilo Byanji ne. Bino pa Juba ja Pentekositi, Aye wialwile Ayemwine kufuma kwikala Mwaana muntu, ne kuya mu Mwaana Lesa. Aye wayishile, kechi *na* bantu ne. Aye wayishile *mukachi* ka bantu, mwamona, yeka Lesa umotu, mu kutwajijila mwingilo Wanji kufikatu, ne mu ino nkulo ikatampe.

⁹³ Aye waawile mu Baibolo, kuuba mba, “Kukeya juba jimo ajo jikabula kwikala mute nangwa bufuku ne, pakuuba mukimye kya mabaanga abufuku kukekala Kyeya.” Pano, juba, mojayikela, jisamina kumusela ne kuzhikila kumuzhika. Ke jubatu jimo, kimye kyonse. Bino, kimye, Mwaana, M-w-a-a-n-a, wimwesheshe Ayemwine mu kusoloka kwa Kyambo kya lailwa, kubena Isalela, bantu ba Kumusela.

⁹⁴ Twajinga na juba ja kamfwa. Twajinga nakyeya kya esankana mu bimye bya bayimejileko kubwezha bintu, kabiji ne bikwabotu, kulenga bipwilo ne madinominesheni, ne kwimvwanga nabo kabiji ne kutwela mukachi; ne kufyopa baana balukeke, ne kusongola bakote, ne kuzhika bafwa, ne bikwabotu; kabiji ne kwikala mu kipwilo.

⁹⁵ Bino, mukimye kya mabaanga abufuku, “Kukekala Kyeya,” Aye waambile mba, “mukimye kya mabaanga abufuku.” Kabiji kafwako Kinembelo kyakonsha kulubankana ne. Kabiji yeka

M-w-a-a-n-a umotu wiyitulwile Ayemwine, *keno*, pa Juba ja Pentekositi, walaile kuuba kintu kimotu mukimye kya mabaanga abufuku. Mwamona? Kijitu mwayila mulaye.

⁹⁶ Bikai tuyukilo pamo. Talai kibena kumweka, kabiji talai pa byo Alaile, popo mwakonsha kumona potwafika peepi. Bikai kintu pamo. Mwakonsha kumona kusololwa kwa yuwe mukatampe kabiji Yeka wabulume. Bisho byapofula bantu, ne jikwabo, ku bibye bintu bikatampe abyo bya awilwe.

⁹⁷ Mosesa, byo ayishile kufuma kumutumba, awo watenenenga Mujilo, byo kyawama akye kimwesho!

⁹⁸ Mosesa wayile ku Ijipita ne kubuula bashakulu ba kipwilo amba Yehoba Lesa wamupepwile mu Jizhina ja “AMIWAJIPO.” Aja Jizhina ke kintu kijipo; kechi “Amiwa byo najinga; byo nkekala ne.” Bino, “AMIWAJIPO,” bimye byonse pamo, aye ujitu pamo keesha, leelo, ne myaka yonse. Aye ke kintu kijipo. Aye. . . Akyo kyaesakanatu pamo na Bahebelu 13:8, “Yesu Kilishitu ujitu pamo keesha, leelo, ne myaka yonse.”

⁹⁹ Kikijitu Kyambo kya awilwe. Kabiji, kipwilo, akyo kyajinga kya kunugankana pamo na Kyambo, ke kyakupitamo kya jino juba. Bayimejileko kubwezha bintu bajinga naky, oo, bino aje ke juba jikwabo. Monai kana juba ka jo tubena kwikalamo. Nobe byonka byo Abujile kwiiya, mu moba oa Yishijilemo pantanda, mu—mu jishinda Mosesa jo ayishijilemo, nangwa mwayishijile ngauzhi uji yense; kechi ja awilwepo ne. Kabiji mu moba akupelako, kya awilwa kwiiya mujije jishinda. Kechi kya konsha kwiiya mu musango wokusangululwa kwakwa Luther ne. Kechi kya konsha kwiiya mu musango wokusangululwa kwakwa Wesley ne. Ke kimye kya kubwezha bintu byobyaji. Ke kimye po kyafwainwa kubwela ku Kyeya kya Mwaana kitutulu, byonka byokyajinga.

¹⁰⁰ Oo, byo twakonsha kutachika Binembelo, pa kyokyo! Kabiji anweba mwafunda ma sukuulu a byambo bya lesa, lubaji ka lwa ntanda kowafuma obewa, mwayuka kyokyo amba Akye kyakiine. Ke mulaye. Akye kyo kilengela bantu kwikala bapusanako bingi. Akye kyo kilengela kwikala bapusanako, nobe byo mwibeta. Ke mambo a kuuba mba. . . ke. . . Akyo kipembe kyanshikuka, kufuma mu bisho, kabiji ne abo Bekimona. Aye ujitu pamo keesha, leelo, ne myaka yonse. Mwamona? Ke—ke mulaye wakwa Lesa, kabiji atweba kuuba twapachika kyokyo ne, mambo Binembelo kechi bya twalwa mungi ne. Ee. Twatana kuuba mba Aye walaile kyokyo. Aye wiyitulwijile Ayemwine mu bantu Banji. Kabiji Aye ujitu pamo keesha, leelo, ne myaka yonse.

¹⁰¹ Mosesa, panyuma yakuya ku Ijipita ne kulondolola bibye, pano Taata po ashinikishe mbila yanji, pa kwiiya ku Mutumba wa Sinai, mu Mumbulungwa wa Mujilo, kabiji ne mutumba yense wajigatu Mujilo. Twajikumona nyi? Awa ye Apaineko

mulaye, Wamuletele kwi abo na Kyambo. Aye wajinga na mikambizho. Kabiji pa kuuba mba ekale naiye mikambizho, wajinga na . . . Aya mikambizho yajinga Kyambo. Akya Kyambo kechi kyakishile ku bantu ne. Nanchi, Kyambo kimye kyonse kiiyatu ku ngauzhi, kabiji wajinga ngauzhi wakyokya kimye.

¹⁰² Nobe, Yesu wajinga Kyambo. Yoano wajinga ngauzhi. Kabiji Yesu wayishile kwi aye, monka mu meema, mambo Kyambo kimye kyonse kiiya ku ngauzhi, kwakubula kukakalwa ne. Mwamona? Akya Kyambo kiiya kwi aye.

¹⁰³ Nanchi, Mosesa, Kyambo kyayishile kwi aye, aya mikambizho. Kabiji aye wajinga naayo. Pano, kika? Kasa Kyambo kikyanyye kupewa ne kusololwa ne, Mosesa wavwetelenga pa meso anji, mambo Kyambo kechi kyajinga kyasololwa kyonse ne. A bo bayukile mba kintukimo kyamweka, bino kechi bayukile kana kyajinga kika ne, ku buluma ne kutatauka. Posotu, byo baambile mba, “Lekaitu Mosesa ambenga, kabiji kechi Lesa ne.”

¹⁰⁴ Lesa waambile mba, “Kyawama, Amiwa kooba kyokyo. Kufumatu pakino kimye, kechi Nkamweka bibye jibiji ne. Amiwa nkebatumina ngauzhi. Nanchi aye. . . Amiwa nkambila kupichila mu ngauzhi Wami.”

¹⁰⁵ Pano, inge Mosesa, wajinga na mizhilo ya kumubiji, (nobe Paulo, mu Kolinda Wakibiji papo, wasolola kwi atweba), wamvwetelenga ku meso anji kasa ajintu na kya kumubiji, pano na Kyabumupashi kechi kikakilemone kwikala na lukumo kabiji ne kumvwetwa kubabula lwitabilo kasa kikyanyye ku musolokela ne! Pano kechi kikakijishepotu kumutela. . . Mosesa amba wabyubilo byapusanako ne. Pano ngaanweba kechi kikakijishepotu kwi mutela, anweba mwapita mikipembe, anweba mwatwela mu Mumbulungwa wa Mujilo, ne kulupukamo na Mapesho! Kabiji pano anweba mwamvwetwa. Abo bantu kechi bakonsha kwikimona ne. Abo kechi bakonsha kwi Kyumvwa ne.

¹⁰⁶ “Inge kya kumubiji kyayikala kya lukumo, pano nga kyakila kya kumubiji! Inge kya kumubiji, akyo kiji napelo yakyo, kyaikala ke kyalukumo, pano Ngaakye kyabula mpelo, kechi kikakijishepo kwikala na lukumo ne!”

¹⁰⁷ Bino, nangwa byonkabyo, Kikijitu kyamvwetwa. Kya mvwetwa kechi ku waitabila ne, kana ku wabula lwitabilo. Aye kechi wakonsha Kwikimona ne. Lesa kimye kyonse wimvweta Ayemwine kubabula lwitabilo. Bisho bi Kifya. Nobe byonka byo baubile mu kyokya kimye, bekyuba ne leelo.

¹⁰⁸ Akya kyajinga ke kipembe kya bumupashi kyo tuji nakyo pa kino kimye, apo pajinga kipembe kya kumubiji. Abo bashinikishiwa na ngauzhi uji na Kyambo kyanembwa, wakwaula, awo wiiya na Kyambo kyanembwa, pa kuuba mba Kikale patoka.

109 Abo bayukile mba Kyambo kyajinga ponka, bino kechi bayukile mo Kyatala ne. Kabiji Mosesa Wikileteletu patoka. Aye waambile mba, “Aya mikambizho yaamba *Kikye*, kabiji *akye* oene mambo.” Aye Wikileteletu patoka. Kabiji kasa Kikyangye kuletwa patoka, Kyajinga kya mvwetwa.

110 Kabiji nanchi byobyoyo kiji, leelo, kyamvwetwa kubantu, posotu kyaikala Kyasololwa patoka kubantu. Lesa, aye Lesa wabulume, wamvwetwa mumibiji ya bantu, akyo Kyambo. Monai. Bino twatana kuuba mba Kyajinga kyafyama kubabula kwitabila, pakuuba kyasololwa ku waitabila.

111 Monai, Mosesa watwelele mumwe mu Mumbulungwa wa Mujilo, bunke bwanji. Kafwako nangwa umo waile nanji ne. Kechi kyajinga. . . kya. . . Akye kyamba ka kwi atweba? Amba kechi wiiya mu Kikye kupichila mu kutwela mujibumba ja ba Pentekosito ne. Mwamona? Aye kechi Wikisolwele ku jibumba ne. Aye Wikisolwele ku muntu umo. Kabiji abyo byobyoyo kiji ne leelo. Mwamba mba, “Amiwa ne walamata ku—ku kipwilo. Amiwa—Amiwa nalamata ku *kikye*.” Bino akyo kechi kyakonsha kwingila ne. Mwamona?

112 Kabiji uji yense kweseka kulondela Mosesa, kwi kifwanyikizha, kyajinga ke lufu. Kabiji nanchi byokiji ne leelo, ke lufu lwa kumupashi, kweseka kufwanyikizha. Abo kyo. . .

113 Bufuku buno, tubena kutwela mo, muji baimana mukachi ka mabumba, kupashang’anya kwa ku mubiji; muntu umo waeseka kuuba nobe Ikyo, kabiji waikala bumi bwapusanako; wakonsha kutoma, wakonsha kupeepa, banabakazhi bakonsha kwikala muji. . . monse mo bakebela kwikela, kabiji nobe ntanda, ne kwikala ku nzubo kabiji ne kutamba televizhonyi, kabiji ne bintu bya muntanda, kabiji kasa bakitela abo bene mba ba Pentekosito. Abo babena kweseka kupashang’anya kintu kya kine. Kikyangye kwibasolokela ne, nangwa pacheche ne. Umvwe Akye kyasololwa, ke kintu kyalukumo, kabiji kintu kimo kifumyamo kyokyo umvwe waenda Momwa. Obewa wikala ke kipembe. Akyo. . . Akyo kechi kyakonsha kwingila ne. Kabiji kwi kipashang’anya Kyajinga ke lufu.

114 Mosesa ne mbutwa ajinga pe aye; wajinga Kyambo kyumi ku bantu. Kabiji leelo, bantu banji na mbutwa ke kintutu kimo. “Abo ke makalata anembwa, atangwa ku bantu bonse.” Kechi kalata *ipya* ne; pakuuba ke Kalata yanembwa, ayo yasololwa. Ke—ke boba baitabila Kyambo ne mulaye wa jino juba, amba Lesa ubena kwitulwila Mupashi Wanji, pa bantu bonse, kabiji abo ke makalata anembwa. Kabiji umvwe muntu waeseka kupashang’anyatu ku mubiji, kikubwelela. Bumi bobo bumweshwa byo uji.

115 Kimye kimo kwajinga songwalume, wantainwe mu lukatazho. Aye wajinga songwalume wawama, bino aye—aye wayile ku konchi. Kabiji ne mutonyi waambile mba, “Nakutana

mba wazhatwa. Nafwainwa ku kumanyika kuya pakaleya mu bumi bobbe.”

116 Aye waambile mba, “Nasaka kutotolola mambo ami amiwa mwine.” Aye waambile mba, “Nasaka kuyamo kupichila kulondela mambo ami.”

117 Waambile mba, “Obewa kechi ujipo na ndondolwelo yobe ne. Ndondolwelo yobe yoya kuzhachisha.”

118 Kabiji abyo byobyo kiji ne leelo, enemambo kipwilo kechi kibena kuya palutwe byo kyakonsha kwikala ne. Ke jishimikila. Ke bumi. Twafwainwa kwikala bepanyisha. Twafwainwa kuketekela Kyambo kyonse kyakwa Lesa. Twafwainwa kukeba posotu akya Kyambo kyayikala ke kitutulu kwi atweba. Mwamona? Mwamona? Aja jishimikila jo jilengela kubula kutwela mukachi.

119 Bino, kimye kimo, (pakuuba mba obewa ufumemo muluno lukatazho), mu kino kinje kimo, songwalume kechi wajinga na mali ne. Aye kechi wakonsheshe kulipila ne. Malipilo ajinga mu masauzande amali ama dola. Bino wajinga na mulongo mukulumpe wayishile na kumulipililako.

120 Pano, tuji na mulongo mukulumpe, Yesu, aye Mwaana wakwa Lesa. Kabiji wayishile na kwitulipilila, inge twakonsha kwi kiketekelatu kabiji ne kutwela mu kipembe pamo Nanji. Nobe, Aye ye Mosesa wetu. Yesu ye Mosesa wetu wa leelo. Mosesa, wamvwetwa, wajinga Kyambo kyumi ku bantu. Leelo, Yesu, wamvwetwa, ke Kyambo kyumi ku bantu, amba, Yesu mu Kipwilo. Aye Mupashi Wazhila, awa Mwaana wakwa Lesa mu bantu, nakusolola Kyambo na mulaye wa jino juba, wikilengeletu Kwikala ikyo. Kimotu ne pano.

121 Kabiji vulukai, Mosesa waubile kikye, kbiji wasolwele kikye, kechi ku ntanda yonse ne, kanatu ku bantu bajinga pa kulupuka, musangotu umo wa bantu, abo bajinga bonka bafumine mu kulu- . . . mu kulupukuka.

122 Kabiji leelo, aye Mupashi Wazhila, ku meso a bantu baamba mba, “Lubuko lwa bulesa kechi lujitu bulongo ne.” Kimye kyo Naipwizhe ipwizhenga . . .

123 Dokotala umo wangichile ami, juba jikwabo, namambo ainetu wakepa kamubiji, oo, kwajinga makatazho foolo nangwa faivi kookwa, bafikile pakipimo kya lufu, kupana ma awala, kabiji aye Mupashi Wazhila wibabukile. Awa dokotala wikipwizhenga. Waambile mba, “Kyakonsha kwikala byepi kikye? Kika,” aye waambile mba, “Na—Na . . . Ao ke mulwazhi wami.”

124 Naambile mba, “Byo kyajinga. Bino pano akye ke Lesa. Ke—ke, ke mambo Anji pano.” Mwamona?

125 Nanchi pano mwamona akye kintu byo kiji, amba Lesa ubena kwita kulupuka, kufuma ku nyuma ya kipembe kya bumuntu

abo basaka kupashang'anya, basaka kwiningako ku kipwilo; kechi ba Methodist, Baptist, Presbyterian, bonse pamo, kana bipwilo byaba Pentekosito. Ke kintu kya pamuntu bunke bunke. Kiji pe obewa ne Lesa. Mwafwainya kutwelamo, kechi jibumba jenu ne, kechi kipwilo ne, kechi kafunga wenu ne, pa kuuba obewa yobe wafwainwa kutwelamo.

¹²⁶ Nasaka kuuba mba mumone kiyukilo kikwabo kyakwa Mosesa, kimye kyo alupukile. Nangwa byonkabyo, byo ajinga ngauzhi, byo ajinga muntu wayukanyikwa, byo alupukile na Kyambo, bantu bamwene mba wajinga waaluluka. Kintukimo kyamumwekejile. Byo ayishile na kyokya Kyambo kyashinikishiwa kya kyokya kimye, aya mikambizho, wajinga muntu wapipulwa.

¹²⁷ Kabiji ne obewa byo ukekala, umvwe wafumamo mukipembe kya bumuntu akyo kyakonsha kuseka pa mpwijilo ya musango yuwe; muntu wakonsha kwitutura pa lubuko lwa Bulesa, ne kwaamba mba moba abya kukumya apita. Wafumamo mukyokya kipembe kya bumuntu momwa, kipembe kya kisho, kabiji muntu yense ukayuka mba kintukimo kyamweka kwi obewa.

¹²⁸ Nobe mulongo wetu wamushingi, Jim Brown. Naketekela bavula ba Presbyterian bayuka mba kintukimo kya mumwekejile, mambo aye—aye wafumine mu kipembe kya kisho. Aye wamwenepo kintukimo mu bantu, akyo kyamukebwile, kabiji wafumine kunyuma ya kipembe.

¹²⁹ Kyawama, anweba, umvwe mwafuma kunyuma ya kipembe, popo mukamweka patoka kumeso abantu, bakonsha kumona mba kintukimo kyamweka kwi obewa. Akya Kyambo kyavwetwa, ku wabula kwitabila, bino kasa kiji patoka kumeso awaitabila. “Yesu Kilishitu ujitu pamo keesha, leelo, ne myaka yonse.”

¹³⁰ Nanchi, kyajinga Lesa. Muoa moba, kyajinga Lesa mu Muntu, Aye Mwaanaji, Yesu Kilishitu. Twaketekala kyokyo. Kechi waajingatu ngauzhi ne, kechi wajingatu mwanamulume wabyonkabyo ne, muntu wabyonkabyo. Kyajinga Lesa mwi Kilishitu; Lesa mu Muntu; kuyula konse kwa Bulesa, mu mubiji wa Muntu. Lesa mu Muntu!

¹³¹ Pakino kimye ke Lesa mu bantu, kuyula konse kwa Lesa mu Bulesa, mu mubiji mu Kipwilo Kyanji kyonse, na kwimwisha Ayemwine, na kufikizha Kyambo Kyanji.

¹³² Pano twatana mba, Lesa, mu mankulo onse, wajinga na kikoba pe Aye. Aye, Lesa, wifilenga kuyuma ya kipembe.

¹³³ Kibena kuvululako ka—kajishimikila ka mwekele ku Kabeta ka bulenge. Kabiji kwajinga nzubo ya Bwinakilishitu. Kabiji mu iye nzubo ya Bwinakilishitu baketekejile Lesa, kabiji abo—abo balangulukilenga mba—mba Lesa ubena kwibakikizha kumakatazho onse. Kabiji, akyo, Aye kyo oba. Kabiji bajinga

na Junya mucheche, songwalume wamucheche wamyaka pepi nobe sebeni nangwa myaka eiti. Kabiji—kabiji wayile ku sukuulu wa Pamulungu kabiji wajinga mwanyike wawama bingi. Bino wajinga bingi na moyo wakipupu, ku kijishamo mu kimye kya kubyasha.

¹³⁴ Kabiji Nabulang'ene kikye ku mwanamulume, juba jikwabo, akye byo kyaumvanyikile mba awe muntu watambula lubuko. Awe wamwingilo umo waambile mba, “Bakwalula obewa ke kalesa, Mulongo Branham.”

¹³⁵ Kyawama, aye wajinga kajimbulushi, nanchi Nalangulukile namba Amiwa nsakwambamotu, pa cheche. Kechi kukebatu kuko Zhang'ana ne, mwayukatu, bino nobe kubatu. . . Naambile mba, “Bushe akyo kiji kwalepa na Kinembelo nyi, kwikala kyokyo?” Mwamona? Naambile mba, “Ine, kechi byokiji ne,” Naambile mba “mambo Yesu watelele ba ngauzhi mba ‘ba lesa.’ Mwamona? Abyo ibyo, ‘Les.’”

¹³⁶ Kabiji abo baambile mba, “Kyawama, anweba mukeba kusenda kifulo kyakwa Lesa.” Akyo kechi kiji kwalepeshatu ne. Abyo kine byo byokiji. Abyo ibyo. Lesa wamwekele mu mubiji, nobe byonkatu Aye byo alaile.

¹³⁷ Akye kisemi kicheche, twatana kuuba mba. Namubuujile aje jishimikila jicheche, ajo jaiya mu milanguluko yami ponka pano. Namba, bufuku bumo kwayishile kipupu, kabiji bainaji baambijile Junya, amba, “Pano, yanga pa nzubo ya peulu, mwanami, kabiji yanga pa mwanya.”

Waambile mba, “Maama, Naumvwa moyo,” byobyoyo aambile.

“Kafwapo kintu kisakukukatazha ne. Yanga peulu pa mwanya.”

¹³⁸ Muccheche Junya walajile popa, kabiji kubyasha kwamwekelenga pa mawindo. Kabiji awe mwanyike waumvwine bingi moyo, wabikilenga mutwe wanji mu kya kwivweta, kabiji watwajijiletu na kumvwa akwa—akwa kubesha, nangwa nakumona kyeya kyakubesha pa mawindo, kabiji—kabiji ne kumvwa kupaata kwamvula. Nanchi aye waambile mba, “Maama!”

Kabiji aye waambile mba, “Kika kyo ubena kukeba, Junya?”

Waambile mba, “Iya kuno tulale pamo.”

¹³⁹ Nanchi wayishile pandandalashi, nobe yense wawama, semi waitabilwa byo akonsha kuuba. Kabiji wayishile, kabiji wamushikwile Junya wamuccheche mu maboko anji. Kabiji waambile mba, “Junya, bainobe babena kukeba kwisamba ne obewa pa kakimye kachechetu.”

Waambile mba, “Kijitu bulongo, maama.”

¹⁴⁰ Waambile mba, “Mwafwainwa kwikala na kikye mumilanguluko. Tuya ku kipwilo, kimye kyonse. Tutanga

Baibolo. Tulomba. Twi kisemi kya Bwinakilishitu. Twaketekela mwi Lesa.” Kabiji waambile mba, “Twaketekela kyokyo, mu kipupu ne byonse byubiwa, Lesa ye bukikizhi bwetu.”

¹⁴¹ Aye waambile mba, “Maama, Naketekela byonsetu bya mu byobyoy. Bino,” waambile mba, “umvwe akwa kubesha kwayikesha pepi,” aye waambile mba, “Na—Nakeba Lesa uji na kikoba Peaye.”

¹⁴² Nanchi, Na—Nalangukuka, kechi yekatu Junya ne, bino atweba bonse twikyumvwa mujojo jishinda. Umvwe twayiya pamo, umvwe twilombelela atweba bene nabene, Lesa uji na kikoba Peaye.

¹⁴³ Kabiji twatana mba Lesa kimye kyonse uji kikoba pe Aye. Kimye Mosesa kyo Amumwene, Wajinga na kikoba pe Aye, wamwekelenga nobe Muntu. Kimye Lesa kyo ajinga kunyuma ya kipembe, Aye wajinga na kikoba pe Aye. Kabiji Lesa, bufuku buno, mu Kipwilo Kyanji, aye wiifya mu Kipwilo Kyanji na kikoba pe Aye. Aye ukijitu Lesa umo, bufuku buno. Twatana kyokyo.

¹⁴⁴ Bino pano, byonka byo kyajingatu kala, kipembe kya kikoba kyo kikwata bisho. Abo kechi bakonsha kuketekela mba Lesa ye wibalengela kuuba byobya byo booba ne. Mwamona? Ke mambo akuuba mba Lesa wivweta mu Kipwilo Kyanji, mu kikoba, kikoba pe Aye. Abyo ibyo. Aye ufiwa kubabula kwitabila, kabiji ne kwisolola ku baitabila. Ee, mwane.

¹⁴⁵ Pano, umvwe kipembe kyabo kya kisho, kya bisho bya bakulumpe ne Kyambo, inge bya onaika, oo, ene mambo, leelo, po kiiya kumweka patoka, Aye tumumona, Bulesa ne jikwabo bwifya mu mubiji wa muntu. Bahebelu 1 byobyoy a amba.

¹⁴⁶ Kabiji ne Ntendekelo 18. Mwavulukuka, Lesa wajinga Muntu, wayimene byobya, na kuja, kabiji ne kwisamba ne Abulahama, kabiji wabulang’ene byaubilenga Sala amwa mu teete kunyuma Yanji.

¹⁴⁷ Kabiji Yesu waambile mba, “Byonka byo kyajinga mu moba a Sodoma, nanchi byobyoy kikekala pa Kwiiya kwa Mwaana muntu.” Bulesa bwiifya jibiji mu mubiji wamuntu! Pano, vulukai, Yesu kechi waambile mba, “Kimye kya kwisolola Mwaana Lesa ne.” Mu Luka kyapitala kya bu 17, Naketekela, kabiji nobe veeleshi wa bu 20, 21, nobe ponkapo, Aye waambile mba, “Kabiji kimye Mwaana muntu byo akesolola.” Aye Mwaana muntu, kubwela jibiji mu—mu—mu Kipwilo, kusolola mu bantu; kechi mba Mwaana Lesa ne, pakuuba Mwaana muntu jibiji, kubwela mu Kipwilo Kyanji jibiji, mu moba akupelako. Twatana mba Aye walayile kiky mu milaye yakwa Lesa.

¹⁴⁸ Twamona kintu kikwabo, mu Lulayang’ano Lwakala. Njina Kinembelo papo, mu Kulupuka. Amba, biseba byakala bya banyama, byabile byepi? Byafiile Lukumo lwa kwa Lesa kubantu. Abya biseba bya banyama; kya kuuba mba ne bantu

kechi be Kimwene ne, mambo kikoba kyo Kikilamine. Akyā kikoba kyajinga... Alwa Lukumo lwa kwa Lesa lwajinga kunyuma ya kikoba.

¹⁴⁹ Kabiji pakino kimye Lukumo lwa kwa Lesa luji kunyuma ya kikoba kyobe. Abyo ibyo. Kabiji bisho kechi bi Kimona ne. Kiji mukachi ka kipembe, monka mwajinga Kyambo Kyanji.

¹⁵⁰ Kika kyajinga mukachi ka kyokya kikoba akwa kunyuma, abya bikoba bya banyama byakala?

¹⁵¹ Kyakuuba, “Kechi mwajingapo musango wabuya kya kuuba mba Tumutajishe ne. Kabiji byo a Lwilwe ke muntu ne kwikala pamo ne atweba, Neapo kechi Mwajingapo buya bwa Kumutajila ne.”

¹⁵² Kabiji ne buleelo kijitu pamo. Kechi mujipo kintu mu mwanamukazhi nangwatu mu mwanamulume, akyo kyo twakonsha kumutajila ne. Kine kitu ke kyokya kiji kokwa kunyuma. Abyo byobyo kiji. “Kyawama,” mwaamba mba, “awa mulongo, Nayuka wajinga kitomi. Aye waubanga *bibye*.” Amiwa kechi natakō muchima ku byo aubanga ne. Kika kyafyama kunyuma ya kyokya kikoba? Kika kiji kunyuma kookwa, akyo kyo kibalwa. Akyo kyokintu, ki bapofula meso bantu. Akyā kikoba kyo kipofula meso bantu. Mwamona? Abo baamba mba, “Navuluka awa mwanamukazhi kimye kyo aubanga.” Nayuka byo aubanga, pano ngakino kimye? Mwamona?

¹⁵³ Abya bikoba, abya kimye kimo byajinga myaayi, pakuuba pa kino kimye bibena kufya Lukumo lwa Lesa, biji Byafiiwa kunyuma yakyo. Kyajinga pa nyama, pa kuuba kino kimye kyaafya Lukumo lwa kwa Lesa.

¹⁵⁴ Kabiji nanchi kikoba kyobe kyakonsha kupipulwa, bufuku buno, ulengwe ke nzubo ya kwikalamo Lesa, Lesa kwikala mubantu.

¹⁵⁵ Talai. Aya myai ya banyama yakala, twatana kuuba mba, kunyuma kyajinga... Mukachi amwa mwajinga Kyambo. Kabiji, akyā Kyambo, mwajinga ne shinkwa wazhila. Aja jikwachi ja sashilwe. Kabiji kyajinga kika? Alwa Lukumo lwa Bulesa lwajinga monkaamwa.

¹⁵⁶ Bino, Kyambo ke Lukunwa, kabiji kechi Kyakonsha kulupula ne kana Ay... aye Mwaana wi Kisanyika. Aye Mwaana wafwainwa kwikala pa Lukunwa, pa Kumulengela kupanga, Kwikilengelela kikapuke. Kabiji aja jojokatu jishinda. Mwabika Kyambo, monai, mwabika Kyambo kya kwa Lesa mu muchima obe, kabiji ne kuya mu Lukumo lwa Bulesa. Kabiji umvwe mwikyuba, Kikaleta shinkwa wazhila, Manna, ao upanwatu ku bantu ba abanwako. Kintutu kyakonsha kwi kija, akyo kyaswishiwa kwi kija, ke bantutu bonka baitabilwa kabiji Bekiyuka. Paulo waambile papo, “Kwalulwa kufuma ku Lukumo kuya ku Lukumo.” Anweba mwamona, kwiiya

kupezhako, Kyayiya poso Kyabwela ku musango Wakyo wa Lukumo lwakala.

¹⁵⁷ Kijitu pamo nobe lukunwa walukumo lwa lukeelo. Lukunwa wa jiluba, uponena mu mushiji. Awa lukunwa wa jitaba uponena mu mushiji. Kintu kitanshi kika? Kilupuka, kabiji ke kamusele kacheche kalupuka. Pano po aya ku kasalala. Nanchi, kufuma ku kasalala, ubwela ku lukunwa yeka mwine.

¹⁵⁸ Kyawama, abyo kine Kipwilo byo kyauba. Kyafumine kwi Luther, Wesley, kabiji pano kyabwela kumwiine Lukunwa, kubwela ku Lukumo Lwakyo lwakala, kubwela ku Lukumo lo Ajinga nalo kuntendekelo. Awa Mwaana waselele ku Musela, ye Mwaana umotu ubena kwisolola mu musango umu ku Kumuzhika, kwalulwa kufuma ku Lukumo kuya ku Lukumo. Kya aluzhika kufuma ku butushi, kuya kwi Luther; kabiji kufuma kwi Luther, kuya kwi Wesley; kufuma kwi Wesley, kuya mu Pentekositi; kabiji kuyatu ne kuyatu, kwalulwa kufuma ku Lukumo kuya ku Lukumo, na kulenga Manna afyamika.

¹⁵⁹ Kabiji pano Kyaapya, kumubwezha Aye byonkatu byo Ajinga ku ntendekekelo, ng'ingijilo Yanji imotu; aye umotu Yesu, abwa bulume bumotu, awa Mupashi Wazhila umotu. Awa yeka Umotu wayishile pa Juba ja Pentekositi, ye Mupashi Wazhila umotu wajikwimweshwa leelo, kufuma ku Lukumo kuya ku Lukumo, kuya ku Lukumo. Kabiji wabwela ku Lukunwa Wanji wakala, na lubatizhilo lwa Mupashi Wazhila; na biyukilo bimotu, bya kukumya bimotu, lubatizhilo lumotu; musango umotu wa bantu, kwingijilatu mu musango umu, na bulume bumotu, byakumvwa ku mubiji bimotu. Ke kufuma ku Lukumo kuya ku Lukumo. Kabiji kyakulondelapo kikekala ke, “Kwalulwa kufuma ku luno Lukumo, kuya mu mubiji uji nobe Wanji Mwine wa lukumo, ako kotukamumona Aye.” Abulahama wamwene musangotu umu.

¹⁶⁰ Pano monai. Twamona byo apipwilwe. Kufuma ku Kalvali, twayitwa kwabanako Lukumo Lwanji. Bino, mu Kolinda Mutanshi 12, “Twabatizhiwa mu Mubiji Wanji. Konka ku Mupashi umu atweba bonse koko twabatizhiwa.” Kechi ku “meema ne.” “Mupashi Umo, atweba bonse twabatizhiwako.” Abo byo, pano, kabiji nanchi twikalala ba kulubaji Lwanji.

¹⁶¹ Naketekela kechi Mbena kwimukwachijijila kimye kyabaya ne. [Kipwilo kyaamba mba, “Ine.”—Waku.] Mwamona? Naketekela kechi byo Nauba ne.

¹⁶² Bino, kijitu pamo nobe busendwe bwa nyimbilo, nangwa nobe kayilo ya kisela.

¹⁶³ Amiwa kechi nayuka byavula bya kukaya bisela ne nangwa bya busendwe bwa nyimbilo ne. Bino Namwenenga akye kisela... Naambilenga pa *Mazhina amubisela*, kimye mwaanami na nabakwabo byo bajinga mukikye. Kabiji abo—abo bakayilenga mukyabusendwe bwa nyimbilo, mu *Mazhina*

amubisela. Abo bakayilenga. Ne bunyimbi bwa—bwa—bwa ubilenga kintutu kimo.

¹⁶⁴ Abo byo byo kiji umvwe wabatizhiwa na Mupashi Wazhila, monka mwi Kilishitu.

¹⁶⁵ Pano, monai, anweba bavula mwatanga nangwa kumvwapo jishimikila ja nyimbi sendwe mwina Russia awo anengezhe lwimbo wakuuba mba *Petelo ne Aye Musuka*. Kabij aye byoabile, boba kikyemumashimbo ne bintutu bikwabo. Kabiji muntu yense ao wayuka aje jishimikila, wakonsha kwijitanga pa kipepala, ne kumvwa abwaa busendwe bwanyimbilo, byo abena kwikyuba, aya nkayilo, byo abena kukaya, kika, bayuka lupipu luji lonse. Bakonsha kutalapo *papo*, ne kumuno lupipu.

¹⁶⁶ Bino, pano, kika kimweka umvwe—umvwe awa unemba lwimbo wanemba kintu kimo, kabiji umvwe twatana mba kechi kyakaiwatu bulongo ne? Tutana kuuba mba nanchi apa pajipo kintu kimo kimweka. Apa pajipo kintu kimo kyabujilwapo, umvwe twi bimona. Aye sendwe wanengezhe lwimbo wamulenga kabiji ne kumunemba, kabiji ne ng'oomba wamwimba, wayikala na nyimbilo ingi. Pajipo kintu kimo kiyatama. Awa upitulukamo wapaine ngyalutwe ingi. Mwamona?

¹⁶⁷ Kabiji alo lolukatazho lujiko leelo, balongo bami bena Luther, balongo bami ba ku Baptist, balongo bami ba ki Pentekosito. Bonse balongo bami bafuma ku ma dinominesheni apusanapusana, abyo byo byo kiji. Mwamona? Anweba mubena kukeba kupana ngyalutwe yanyimbilo ya mumoba akwa Lether, Wesley, nobe byonkabyo, kimye aye, kine kintu, aja Jibula ja nyimbilo papo pamweshatu mba ke bya mujuba jikwabo. Mwamona? Mwamona? Mwamona? Atweba kechi twakonsha kwikela ku kyeya kya kwa Luther ne; aye wajinga wankebelo yakupipula bintu. Twasachila lwanji—lwanji lubaji, bino twaakaille kyokyo. Twaya palepa bingi *papo* kunyuma ya buuku. Mwamona? Atweba kechi twakonsha—atweba kechi twakonsha kwi Kikaya byobya ne.

¹⁶⁸ Pano, jishindatu ja kwikyubilamo pa kuuba mba kyubiwe, balongo bami, ke jije. Kabiji balongo ba mukyaalo kyonse kyapanshi, ba mumapuzha apusanapusana akyaalo kyonse, Nakonsha kwaamba mba, kujitu jishinda jimo jakwa—jakwa yewa utangijila bunyimbi mo akonsha kwikyubilamo. Aye wafwainwa kutwela mu Mupashi wajingamo yewa wa Nembele lwimbo, apo nishi uji Nakyo. Kabiji umvwe Kipwilo, aya ndoonda Yang'imbilo Ayoine, apo kyaalo kyonse kibena kupembelela abye biyukilo ne bya kukumya; umvwe Kipwilo, ne Wanembele lwimbo, ne yewa utangijila ngyalutwe, bonse batwela mu Mupashi wayewa Wanembele lwimbo.

¹⁶⁹ Umvwe baamba mba, “Moba abya kukumya apita,” kechi kikala na nyimbilo yaitabilwa ne.

170 Pakuuba umvwe kyayikala mundoonda Yakyō, kabiji ne Mupashi waitabilwa Wanji; usakwikyuba byepi posotu Mupashi waikila, wayewa Wanembele lwimbo? Amena. Pano umvwe waamba mba, “Aa moba abya kukumya kechi apita ne,” abwa busendwe abo bwimba, “Amena!” Umvwe twavumya, amba, “Yesu Kilishitu ujitu pamo keesha, leelo, ne myaka yonse,” Busendwe bwanyimbilo bwiimba, “Amena!” “Anweba mukatambula bulume Mupashi Wazhila byo akeya pe anweba.” Abwa Busendwe bwang’imbilo buvuma, “Amena! Amiwa nji Nakyo!” Kechi kujipo byakufwanyikizha pa kikye ne. Abwa Busendwe bwang’imbilo bwa endela pamo na Kyambo. Kibena kuya. . . [Mulongo Branham watota lupi jisatu—Waku.] Abo byo kiji. Oo! Ke kintu kyakila bingi kuwama. Awa utangijila ngyalutwe ne Wanemba lwimbo bafwainwa kwikala mu Mupashi umo. Kabiji nanchi ne bemba nyimbo bafwainwa kwikala mu Mupashi umo, pa kuuba mba be Kyubile pamo. Kabiji ntanda yonse ibena kukumya na mambo abintu bibena kubiwa.

171 Komunisimu yebambapo, ne kundengela amiwa kumvwa kukolwa nakyokyo, kabiji byonse bye byakwimvwanga ne bintu byonse, kabiji ne kwisalulula. Oo, lusatu! Byabyobya, byonse bye byabulamo maana, Kwiya kwa Nkambo saka kujitu pepi, kujipo kintu kimo kibena kuvuma bibi. Amiwa na akamwa mba awa utangijila ngyalutwe yabung’imbi. . . Awa utangijila ngyalutwe bunyimbi wafumamo mu Mupashi wayewa Wanembele lwimbo.

172 Umvwe twayikala na Mupashi wayewa Wanemba lwimbo, abwa bulume bwiine bwakwa Lesa abo Baibolo bo aambile mba, “Bantu bakala batwajilwe twajilwe ku Mupashi Wazhila pakuuba mba banembe Baibolo,” mukebimona abya bipepala bibiji bya kina China bikasambakana pamo, nobe byonkatu Baibolo wakwa Lesa ne waitabila bakasambakana pamo, mambo bonse bajitu mu Mupashi umo. Abo bonse babiji bajitu kintu kimo. Abo banungakanatu bulongo pamo. Bootubena kukeba leelo ke bakutangijila bunyimbi, abyo ibyo, ne kubwela Kyambo, kubwela ne Kwikitabila nobe monka mo Kyaambilwa. Apo popo mwakonsha kumona Lesa, Ayemwine. Akwa ko kumvwetulapo. Aya kaiyilo ileengwa bulongo.

173 Leelo, baamba mba, “Kyawama, Aye ke Lesa wajishimikilatu. Twayuka mba Aye waabukile Kalunga Kachila. Aye waubile byonse *bye*. Kabiji Aye wajinga mu—mu kisha kya mujilo, na baana ba ba Hebelu.” Buwame ka buji na Lesa wajishimikila, inge kechi, inge kechi Aye ujitu pamo ne? Muntu utakaikatu Lesa pa kyo Aubile kunyuma, ne kulanguluka Aye byo akoba kulutwe, kabiji ne kuvulamako byo abena Kuuba pakino kimye. Akyo kijitu mu muntu kya kuuba byo byo. Kabiji kijitu pamo ne buleelo, balongo bami. Kekitu kijitu pamo. Oo, ami!

¹⁷⁴ Twayai tubwele kunyuma ne kwikala na Busendwe bwa ng'imbilo buji bulongo, apo ba muntanda po bakonsha kumona. Yesu waaambile mba, "Umvwe Nashikulwa kufuma pano pa ntanda, Amiwa kabungizha bantu bonse Konji." Kabiji, "Aye ye umotu keesha, leelo, ne myaka yonse."

¹⁷⁵ Lekai bakutangijila ng'imbilo bekale mu Mupashi wawama, na bang'imbi ne na Wanemba lwimbo, bintu byonse bikekalatu bulongo. Nishi apo atweba, kafwako kufwanyikizha pakikye ne, atweba nishi twayukanyikwa Nanji. Bahebelu 13:8 waambile mba, "Aye ujitu pamo keesha, leelo, ne myaka yonse."

¹⁷⁶ Atweba twayukanyikwa Nanji mu Byubilo 2. Atweba twayukanyikwa nabo, na lubatizhilo lumo, kintutu kimo. Byonse byo Ajinga kyokya kimye ne byonse byo Anji, byonse byo Ajinga ne byonse byo Anji, byo byo tuji. Abyo kine byokiji.

¹⁷⁷ Kijitu pamo inge Mbeni kukeba kwikala mwina America wakineke, Nafwainwa kuyukanyikwa ku byonse byo ajinga, mu byonse byo anji. Nafwainwa kuyukanyikwa nakyo, umvwe ne mwina America wakineke.

¹⁷⁸ Umvwe Ne mwina America wakineke, nanchi Nafikile pa Jibwe ja Playmouth. Amena. Naubile, inge Amiwa ne mwina America. Nanchi byowaubile neobewa; wafikile pa Jibwe ja Playmouth na bashakulu bakang'enda. Pa Jibwe ja Playmouth, byo bafikile popa, Najinga nabo; ne obewa pamo, muntu yense.

¹⁷⁹ Najinga pa mbili ne Paul Revere, monka amwa mu mukwakwa, na kumujimuna ku bulemo. Abyo kine ibyo.

¹⁸⁰ Ponkatu pa Kipachiko kya Forge, Naabukile pa mabebe amanshika aku Delaware, na jibumba ja bashilikale abo, kichika kyabo, kechi bajinga na sapato ne. Nalombele bufuku bonse ne George Washington, na mabokotu. Na abukile Delaware na kimonwa mu muchima wami. Atweba twibena America. Ee, mwane. Pa Kipachiko kya Forge, kine Nekyubile.

¹⁸¹ Nabwezhezhe lusanchilo na Lusanchilo lwiine lwa bashakulu. Nabwezhezhe lusanchilo kwi Lesa. Umvwe Amiwa ne mwina America wakineke, Nayukanyikilwe popa yewa tebulu.

¹⁸² Umvwe Amiwa ne mwina America wakineke, Nayukanyikilwe byo Naimene ne Stonewall Jackson.

¹⁸³ Umvwe Amiwa ne mwina America wakineke, Nayukanyikilwe pa Kijilo Kyamakabe aku Boston, ee, mwane, po twakaine kwikala na bintu bya bikwa pa meso etu. Kyawama, Amiwa jipamo nobe mwine America. Nayukanyikilwe kookwa nakyokya. Ee, mwane. Oo, ami!

¹⁸⁴ Naimbile Mbelu wa Bwanabwabene, pa mutanshi foolo wa July, mukwa wa 1776. Naimbele Mbelu wa Bwanabwabene kuno ne kubijika mba tuji na bwanabwabene. Pakuuba mba wikale mwina America wakineke, Nafwayijilwe kuuba.

185 Nayukanyikilwe nabuvu bwanji mu Kupipulwa kwa bintu, mu kimye mulongo po a lwishishenga. Nafwainwa kusenda buvu bwanji, nobe byonka byo Nafwainwa kusenda lukumo lwanji. Umvwe Amiwa ne mwina America, byo Nafwainwa kwikala. Nayukanyikilwe nanji. Ee, mwane.

186 Nayukanyikilwe ku Gettysburg kookwa, mu kimye Lincoln kyo apaine ng'ambilo yanji. Ee, mwane.

187 Najinga pa Kitulu kya Wake, nayoya mibiji ya mashi yabashilikale. Naimene pa Kitulu kya Wake.

Pa Guam, Nakwashang'ene kwimika mbandela.

188 Amiwa ne mwina America mwine mwine. Amena. Byonse byoanji, Byonji, kabiji ne walusekelo nakyokyo. Ee, kine. Byonse America byoajinga, byonse byoanji, Amiwa kiji byobyoy, kwikala mwina America. Musango yense ye ajingamo, Nafwainwa kwikala byobyoy, mambo Nayukanyikwa nanji.

189 Kintutu kimo, mambo akwikala Mwinakilishitu wakine, wafwainwa kuyukanyikwa nabo.

190 Nasapwijile ne Mosesa, kabiji najimwi- . . . nangwa ne Nowa, kabiji wajimwine bantu mambo aluzhachisho lwaishilenga; pa kwikala Mwinakilishitu wakine.

191 Najinga ne Mosesa pa kipupu kyatemenenga. Namwene Mumbulungwa wa Mujilo. Namwene Lukumo Lwanji. Najinga ne Mosesa amwa mungyetu, na mambo akwikala Mwinakilishitu. Nafwainwa kuyukanyikwa mu byonse Lesa byo ajinga nabyo, na mambo akwikala Mwinakilishitu. Namwene Lukumo Lwanji. Naumwine Jiwi Janji. Kechi mwafwainwa kulondolola kufumyako amiwa ne, mambo Najingako. Nayuka kyo Mbena kwaambapo. Namwene kyamwekelenga. Ee, mwane.

192 Najinga pa Kalunga Kachila, po Namwene Mupashi wakwa Lesa kwikala panshi ne kwabanya meema aku ne kuku; kechi kupita mu matete ne, kechi byo babena kweseka kwaamba leelo ne, bino kupita mu kalunga mwazhika naite-fuutu. Namwene Mupashi wakwa Lesa. Naendele ne Mosesa kupita pa mushiji wauma, kwabuka koka Kalunga Kachila.

193 Naimene ku Mutumba wa Sinai kabiji namwene kilulumo ne kubeshabesha. Najile nabo Manna kokwa. Natomene kufuma kujoja Jibwe. Amiwa mbena kukikyuba bufuku buno. Nayukanyikilwe naboba bajilenga-Manna. Nayukanyikilwe nabo aba batomene kufuma ku Jibwe.

194 Najinga wayukanyikwa kimye Yoshiwa byo ayimbile tolopita, kabiji bibumba bya Yeliko byaponene panshi.

Najinga ne Danyeke mujiyengo ja mabokwe.

Najinga mu kisha kya mujilo na baana ba Kihebelu.

Najinga ku Mutumba . . . ne Elaija pa Mutumba wa Kamela.

¹⁹⁵ Najinga ne Yoano Mubatishi, kabiji ne kumeso aboba bakajimbulushi. Namwene Mupashi wakwa Lesa byo ayikijilenga. Naumvwine Jiwi ja kwa Lesa na kwaamba mba, “Awe ye Mwaana Wami Mo Namwena lusekelo kwikalamo.” Ee, mwane. Nayukatu kine namba nayukanyikilwe. Abyo kine ibyo.

¹⁹⁶ Nayukanyikilwe kookwa ku kilende kya kwa Lazalaza, byo Asangwile Lazalaza. Nayukanyikilwe, na yewa mwanamukazhi ku mushima, byo Amubujile bubi bwanji. Ee, mwane.

¹⁹⁷ Amiwa kine nayukanyikilwe ne Aye mu lufu Lwanji. Kabiji Nayukanyikilwe pa Lusanguko lutanshi. Nasangwilwe Nanji kufuma mu lufu. Nayukanyikilwe Nanji mu lufu Lwanji.

¹⁹⁸ Najinga na ba aduleendi na tweti, pa nzubo ya peulu. Nayukanyikilwe nabo popa peulu. Ei! Na—Naumvwa bupopweshi. Oo, ami! Nayukanyikilwe kookwa. Yami umo mwiabo. Nayukanyikilwe. Najinga na kyakupitamo kyo bajinga nako. Najingako byo kyamwekele, na mambo akwikala Mwinakilishitu wakine. Najinga kamonyi Mwela wabulume byo apupilenga. Natainwepo pakyokyo. Naumvwineko bulume bwa kwa Lesa byo Bwasukene. Najinga nabo aba baambile mujimi. Naumvwine akwa kushingwa byo kwayishile. Najinga nabo. Nayukanyikilwe nabo kimye Mupashi Wazhila byo atatwile kwamba mujimi, ne abo.

¹⁹⁹ Najinga ne Petelo, ku meso aba kajimbulushi mu Byubilo 2, kimye kyo asapwijile abwa busapwishi bukatampe. Nayukanyikilwe nanji. Ee, mwane.

²⁰⁰ Mu Byubilo 4, byo bapwijile pamo, Najinga nabo kimye kishimikwa byo kyasukene. Panyuma ya pwijilo ya milombelo, kishimikwa kya kusukene po baikele. Nayukanyikilwe nabo kookwa.

Nasapwijile ne Paulo pa Katumbatumba ka Alepangusa. Ee, mwane.

²⁰¹ Najinga ne Yoano pa kitulu kya Patamosa, ne kumona Kwiiya Kwanji kwabubiji.

Najinga ne Luther mu kimye kya kubwezhiwa.

²⁰² Najinga ne Wesley, awa musapwishi mukaji, wasopwelwe kufuma mu mujilo, mu kimye kya kusatukilamo kipwilo kya Anglican. Najingako nabo.

²⁰³ Kabiji Njikuno bufuku buno, 1964, mu Filadefya, Pennsylvania, nayukanyikilwe na musango wajibumba jimo, na musango umo wa kyakupitamo. Nafwainwa kwikala, namambo akwikala Mwinakilishitu. Nafwainwa kwikala nayukanyikwa paji Kyambo kya kwa Lesa kasa kibena kusololwa. Nayukanyikilwe na jibumba ao umvwa Mupashi Wazhila.

204 Amiwa nayukanyikwa na jibumba aja jayuka mba Aye wamwekanyikwa, ao wayuka mba Aye ye umotu keesha, leelo, ne myaka yonse, abo bayuka mba Akye kechi kya kukayishatu ne. “Ke Yesu Kilishitu umotu keesha, leelo, ne myaka yonse.” Amiwa nayukanyikwa najije jibumba muno, bufuku buno. Nangwa byonkabyo, batelwa mba ke jibumba jabacha, nangwa byonkabyo ke jibumba ja bakajimbuluzhi, na mambotu a Kyambo kya kwa Lesa. Bino, “Amiwa kechi ne omvina buvu Mamboawama a Yesu Kilishitu, mambo Kebutume bwa kwa Lesa butwala kulupulukilo,” kabiji Neumo. Amiwa njinao makalata omi o Naambilepo, ashiniinwa, Lesa wafiiwa mu musango wa bumuntu, mu banabalume ne banabakazhi. Oo!

205 Lesa mu *en morphe* Wanji jibiji, wi vwetwile Ayemwine ne kwilenga Ayemwine kuyukanyikwa ku bantu Banji. Aye Mfumu mukatampe Ao watujile kulubaji Lukumo Lwanji. “Bino mu kakimye kacheche ntanda kechi bankamona Amiwa nejikwabo ne. Amiwa kafiiwa kwi abo. Pakuuba anweba mu Kamona, mambo Nkekala nenu, ne mwi anweba, kufikatu ne kupelo, kupipulwa kufuma kwi Luther kuya kwi Wesley, kuyatu kulutwe ne kuyatu kulutwe, kufuma ku Lukumo kuya ku Lukumo. Amiwa yami Lesa umotu awo waikele nabumi, kabiji ne kubwela ku Lukumo lwakala.” Aleluya!

206 Aye waonauna kipembe kyonse kya kidinominesheni, kyonsetu kikanya jiwi kumvwanika. Aja jiwi jaamba mba, “Oo, akye kechi kisangajimbwe ne,” Aye waonawine kupita mu byonse bya. Aja jiwi jafumine momwa, jaambile mba, “Oo, abo bantu baya mungi,” Aye waonawine kupita mukyokya kipembe. Ee, Aye wikyubile. “Oo, kuuba mwikyuba ne. Kafwako byo muji ne ke jibumbu ba bantu banji na kisangajimbwe.” Aye waonawine kupita mukyokyo. “Kechi kujipo kintu kya kuuba mba lubuko lwa Bulesa ne.” Aye waonawine kupita mukyokyo, oo, ami, mambo Kyambo Kyanji kyaambile mba Aye ukeyyuba. Anweba kuuba mwashinda Kyambo kya kwa Lesa ne.

207 Kabiji Aye wayimana popa, nangwa byonkabyo, bufuku buno, Kashinde wabulume, kufumatu kimye kyo Aonawine yense Methodist, Baptist, Presbyterian, ne musango mukwabo uji yense wa kipembe. Aye ukimanatu mukachi kabantu Banji, bufuku buno, kechi washindwapo na bisho ne. Lekai bantu bambe kyonse kyo basaka kwamba, boobe kyonse kyo bakeba, kiji kyonse kyobasaka kuuba. Lesa wiiya, na konauna kupita pa joja jiwi jikanya kumvwanika.

208 Kabiji vulukai, amiwa bambula mba, umvwe ndenke yakila pakyokya kikuwila kyao, kechi pajipo pa kupelela pa kunyema ne.

209 Mbena kukubula mba, umvwe waonauna aya mikika ya kitemwa, amba “Yesu ke wakunyuma, kabiji kechi Ye wakino kimye ne,” umvwe mwatana mba Aye ujipamotu keesha, leelo

ne myaka yonse, kechi kujipo pakupelela po kyoakonsha kuuba Lesa muino pwijilo ne, kabiji ne kumweshwa ino ntanda kyo bakeba: kechi ngubilo ya panopantanda ne, kana poso kusangululwa kwa ntanda ako kukaleta kuyulwa kabiji ne kubatizhiwa na Kyeenyi kyakwa Lesa mumi, *en morphe* wifya Ayemwine mu mibiji ya bantu. Aleluya! Nekiketekela kye.

²¹⁰ Konauna mikika yonse, kipembe kyonse, kipembe kyonse! Kafwako kyakonsha kufya Kyeenyi Kyanji ne. Umvwe bantu bazhingila mu michima yabo, kuji kipembe kyanengezhiwa konaunwa. Mwakonsha kukosela pa kyokyo. Tabulai kipembe kiji kyonse, na Wanji mukatampe Mupashi Wazhila!

²¹¹ Kabiji Aye waimana pano, bufuku buno, aye Kashinde walukumo, ujitu pamo keesha, leelo ne myaka yonse; kubuka bakolwa, kubatizha baitabila, nobe byonka Byoaubanga kala. Aye Kashinde wabulume. Bazhatwa badiabola babena kunyema. Ee, mwane. Kimye kyonse byo babena kuuba, umvwe Aye uji ponka.

²¹² Mukupezhako, Nakonsha kwamba kikye. Kwajinga ji... Natangile jishimikila, myaka yavula kunyuma, ja pakyasa kyakala. Wajinga na kyasa kyakala kyo bapoteshenga. Anweba mwijumvwapo aje jishimikila, bimye byavula. Kabiji bakebelenga kwikipotesha na kintu kimo. Kabiji mupoteshi waambile mba, “Ing’anyi usa nkupa *kikananga-ne-kikananga*?” Naketekela bamupele mangwe acheche, kape bangwe fifite, nangwatu kintu kimo. “Kuya jimo, kuya jibiji, . . .”

²¹³ Ponkapotu, mwanamulume waimene kunyuma. Aye waambile mba, “Paka minetitu kamo.” Kabiji waendele kuyako na kwitambula. Twayai tulanguluke mba wayimbile yuwe:

Kuji Nsulo yayula na Mashi,
Kufuma mu mishipeshipe yakwa Emanuele,
Akufyamamo ba mambo,
Bubi bwabo bonse bupwa.

²¹⁴ Pano byo ekitujile panshi, kechi kwajingapo jiso jaumine muyoya puzha ne. Pano popo aambile mba, “Ing’anyi usakupana?”

²¹⁵ Umo wambile mba, “Faivi sauzande.” “Teni sauzande.” Kyajinga kyabula mutengo. Kika? Aye—aye sendwe wakala wa kyasa wasolwele bwine bulumbuluke bwakyo.

²¹⁶ Oo, mulongo, nyenga, pano lekai Nkambo ya kikye Kyambo, Ao Wikinembele, Mupashi Wazhila mukatampe, shikulai kokola Yanji na butemwe, ne kwiikokela pa muchima obe.

Kuji Nsulo yayulwa na Mashi,
Kufuma mu mishipeshipe yakwa Emanuele.

²¹⁷ Mukamona kufikila kwa kulumbuluka kwakyo, kabiji ne kumona kumvwetulwa kwa kwa Lesa kwamwekanyika patoka. Kyakuuba mba, Aye ujitu pamo nobe byonka byo Ajinga byo

Aponene pa Juba ja Pentekositi, pa bantu, kimye Aye *kenos'sed* Ayemwine, “wiyitulwijile” monka mwi Akyo. Abyo ibyo.

218 Mwaamba mba, “Mulongo Branham, Naeseka. Naeseka. Nauba *kikyey, kyokya,* ngwatu *kikwabo.*”

219 Juba jimo Najinga na mbung'eno pa Carlsbad, New Mexico. Kabiji twayile monka mwakukayila bisela mwakala mukatampe. Kabiji kyajinga nobe na mwekelo-yakuchinisha, kabiji twaikele monka mwa. Kabiji aye—aye mwanamulume, byo afikile muyoya puzha, aye—aye wazhimishe malaiti. Kabiji, oo, ami, mwafwainwa kulanguluka byo mwaikela fishi. Kijitu nobe. . . Mwajinga mwafita bingi kya kuuba mba wakonsha kwiyumvwa.

220 Kabiji abyo kijitu pamo na bimye byo bina kwenda, inge twamona kipwilo kikakalwa kuyuka Lesa Kyambo; umvwe mwamona banababakazhi ba Ziyona ke bobo musango umo mobabena kubila; umvwe mwamona balongo betu bapepa ne kutoma, kabiji—kabiji ne kwaamba bisela byatama ne bintutu bikwabo, kabiji akwe kasa bakeba kutwajijila na kwamba mba banji mwi Kilishitu. Oo, ami, ke fishi. Kefishi yafitatu bwi.

221 Twamona kiyukilo kya Kwiya Kwanji. Kukekala. . . Kimye kyonse pafita bingi inge kebuye nakukya. Ponkapotu Ntaanda wa Kumakya wasela mukusekelela juba jibena kwiya, kabiji ne kwijitambulwila, ne kumwasha mba jibena kwiya. Monai.

222 Monkamwa, byo beazhimishe, mwajinga kasongwakazhi kabijikile najiwi jikatampe bingi. Kwajinga songwalume wamuचेche waimene kwipi na yewa utangijila, kabiji wamwene awa utangijila wazhimya malaichi muyewa musango. Kabiji awa nyenga wamuचेche wajinga pepi nakufwa kashita. Aye wabijikilenga, na kutolauka peulu-ne-panshi. “Oo! Kika kyalondejilepo? Lukatazho luji kwepi? Lukatazho luji kwepi?”

223 Mwayuka byo abijikile? Aye waambile mba, “Kuchina ne, nyenga wamuचेche. Kuji muntu wakonsha kwambula malaichi.”

224 Telekai, nyenga wamuचेche, wakonsha kulanguluka mba tukiji banyike kabiji kechi twavula ne. Bino, kuchina ne. Kuji Muntu kuno Wakonsha kwambula Malaichi. Awo ye Mupashi Wazhila. Mwikiketekela nyi?

225 Twayai tukunyiye mitwe yetu pakakimye kacheche. Nalomba lulekelo lwa mambo pa kwimulama kimye kyabaya.

226 Anweba Lesa mukatampe wa Mwiulu, kwisolola Anwebabene, kwi mwesha patoka Anwebabene, kwilengela Anwebabene kuyukanyikwa, Mfumu mukatampe wa Lukumo, abye byonse bya kulodolola londolola, bufuku buno, lekai kuponene mu michima ya bantu. Kabiji tumone awa Umo wisolola, awa Umo Ao wayishile ne kulepula kipembe kya tente walusambakeno; kabiji popo alupukilemo amwa mukyokya

kipembe, ne kwiiya monka mubipembe bya bantu jibiji, pa Juba ja Pentekositi; kikalatu pamo kimye kyonse, kwalulwa kufuma ku Lukumo ne kuya ku Lukumo.

²²⁷ Kabiji pano atweba twabwela pamo nobe bilengwa byonse, ngubilo, kubwelatu ku Lukunwa mutanshi, kufumatu ku nkulo ya kipwilo kimo kuya ku ikwabo. Kabiji ne muino nkulo yapelako, tuji pano, twabwelatu ku kine Kintu kitanshi akya kyaponene pa Juba ja Pentetekositi, mukufikizha Kinembelo kyonse, “Akya Kyeya mu kimye kya mabaanga,” kabiji, “Aya mingilo yo Nguba ne anweba pamo,” kabiji ne bintu byavula byo Mwalaile mu Kyambo Kyenu.

²²⁸ Taata, inge pajipo umu muno awo wakibula kupita mukyokya kipembe ne, nangwa umvwe kwayikalapo umu muno awo ubena kupashang’anyako muntu umu awo wapita kala mukipembe, ubai lusa bufuku buno, Taata. Bakonshe kumona awa Kashinde wa bulume kasa aimana pano, wayula na lusa ne na bulume, lwa kulekela mambo. Kiswishai kye, Taata.

²²⁹ Kabiji mu kimye kyo twakunyika mitwe yetu, mwakonsha kwikalapo bamo muno nyi? Baanga, Nakonsha kwamba mba, abo bakonsha kwamba mba, “Mulongo Branham, Nasutula kuboko kwami. Ndombeshaipo?” Twajijilaitu na kukunyika mutwe wenu, kabiji kasa mwasutula kuboko, “Nasaka namba pite mukipembe kyonse, posotu Nakonsha kumona Kashinde.” Lesa emupeshe. Ami, pa ao maboko! Peulu kubaji mu bibamba byapeulu, ku kilujo? Lesa emupeshe. Bibamba bya kunyuma? Imanai. . . Lesa emupeshe. Ikalaitu ba bukishika. Ku kipiko? Sutulai maboko enu, ne kwamba mba, “Mulongo Branham, Naikala Mwinakilishitu pa myaka yavula, bino, kinekine, Amiwa kechi nakipitamomu mukyokya kipembe ne. Amiwa kechi nakikyuba ne. Amiwa kechi jina Nakyokya kyo bajinga nakyo mukyokya kimye ne.” Leelo, tuji. . . “Amiwa ne kijimwa kiji mumushiji wawama.”

²³⁰ Tolai jiluba jakomena mu mushiji ukomesha bukiji, mwafwainwa kwijilela nobe mwaana, kwijitetemba, kwijisansa, kwijitekezha. Pakuuba akya kijimwa kikomena momwa mukiselembwa, musango umotu wajiluba, jimwekatu nobe ijo; kechi jitambulapotu nangwa pacheche meema ne, bino kafwako kilongolo nangwa kimo kikalako ne. Ajo jakosakana. Ajo ja bukine.

²³¹ Mwakonsha kwesakanya pamo Bwinakilishitu na Bwinakilishitu leelo, na byo bwajinga mukyokya kimye nyi? Mwakonsha kufwanyikizha aje jibumba, botutela mba Bwinakilishitu bwa leelo, kuzhokoloka ntanda yonse, kwikala pamo nobe boba balondejile Pentekositi; kwibalama nobe baana ne kwibatekenesha, kabiji kufuma ku kipwilo kimo ne kuya kukikwabo, kabiji, umvwe waamba kintu kimo kyo babula kutemwa, bemana ne kulupukamo? Kabiji, oo, mwakonsha

kufwanyikizhakyokyo nyi? Ine. Lukatazho lujipi? Kelukatazho lwa kusemwa.

²³² Michelangelo, awa walengele kipasha kyakwa Mosesa, mwakonsha kutana kulengwa kwakyokyo, pamutengo mucheche bingi. Pakuuba, akya kitanshi?

²³³ Awa walengele Kijilo kya Nkambo, Naketekela kine kitanshi kyalengelwe kyakonsha kupotwa mamilyoni amadola, kana wakonsha ne kwi kipota. Amiwa kechi nayuka ne kokiji ne. Bino wakonsha kupota pamutengo muchechetu kyakyokya kyalengwa jibiji kape nobe dola umo ne naite-eiti mangwe. Mwakonsha.

²³⁴ Kabiji abyo byobyo kiji mu buleelo. Mwinakilishitu wabula mutengo, walengwa ja bubiji, aye watwelatu-mukipwilo, mwakonsha kwi bapotatu nakasanga nangwa na—na maalwatu oka. Nangwatu, mwanamukazhi uji na suki yo babeya nangwa na mivumbo yo bampeta, mwakonsha kumupota nakintu kiji kyonse muntanda ya mafwashi. Pakuuba kechi mwakonsha kukwata awa wakinekine ne.

²³⁵ Namumona Aye kumweka patoka, aye umotu keesha, leelo, ne myaka yonse.

²³⁶ Oo, Mwinakilishitu, kechi ubena kukeba kwikala Mwinakilishitu wakine nenyi? In aboge paji boba bajikubula kusutula maboko abo, mwakonsha kwikyuba nyi? Kyawama, Amiwa sakulombatu. Lesa emupeshe. Lesa emupeshe. Oo, akyo kijitu bulongo. Talaitu pa kyokya.


²³⁷ Taata Wetu Wamwiulu, “Kyambo Kyenu kechi kikabwelatu kwi Anweba kyatutu ne.” Anweba Yenu mwalaile. Amiwa jitu namwingilo wa kwamba akya kyo Mwaambile Anweba. Amiwa mbona kupitulukatu mu Byambo Byenu. Anweba mwaambile mba, “Aye umvwa Kyambo Kyami, kabiji ne kumwitabila Aye Watuma, uji na Bumi Bwape.” Mwikilaile anweba.

²³⁸ Kabiji, Nkambo, twayuka mba tujinabo basombololwa ne leelo, bavula bamuboba baamba mba baitabila, bino, kasa babula ne. Kimweshatu mba. Bino, Nkambo, kobaji bamo bakishika, ne abo.

²³⁹ Nalomba mba Anweba musakupana, muno, bufuku buno, amba yense mwanamulume ne mwanamukazhi, songwalume nangwa songwakazhi, nangwa bekaletu bang’anyi kyaalo, nangwa bekaletu ba mushobo ka, nangwa bekaletu ba kung’anyi kipwilo, Anweba Lesa, bayuzhai. Bakonshe kumona kusololwa kwiine kwa yewa Yesu umo leelo, monka mukachi ketu, byonka Byoanjinga pa Juba ja Pentekositi, Aye byo emwesheshe Ayemwine ku ino nkulo, kwikala Mupashi Wazhila. Kiswishai kye, kumona Byambo byafikizhiwa, bya bungauzhi byafikizhiwa!

²⁴⁰ Twaesakanya, leelo, na kyokya kyatelwa mba kipwilo kya ntanda yonse, Kinje Kyantanda yonse kya Bipwilo, kabiji mwesakanye na mulaye wa pa Pentekositi? Kechi kujipo kwibyesakanya, nangwa pachechetu ne. Kechi twakonsha kwikala na bivwalo byetu byafita amba biwashiwe pa joja jichikichi ne.

²⁴¹ Bino, Nkambo Lesa, inge twakosha kubwela kuyoya Nsulo, muji ng'ingijilo ya kutokeshiwa, apo byakupitamo byetu ne Kyambo kya Lesa bikendela pamo. Nanchi, twakonsha kwaamba mba byetu. Kiswishai kye, Nkambo, bufuku buno, byo Mbena kupana babo bantu mu maboko Enu. Panai ku muntu yense byo twakabila, Taata. Twaipuzha mu Jizhina ja Yesu. Amena.

²⁴² Lesa emupeshe. Ne musachila, bingi, pa kwimana, na kupembelela kimye kyabaya. Kabiji Amiwa mundekeleko mambo Nemulama na mamineti teeni akilapo pa nyuma yakukumana teeni. Lesa ekale ne anweba posotu Kemumone mukimye kya lukeelo. Napana kutangijila kwiba, Naketekela, kuubena kutangijila mbung'eno. 

LESA WABULUME WASOLOLWA KWI ATWEBA KDE64-0629
(The Mighty God Unveiled Before Us)

Ino Mbila na Mulongo William Marrion Branham, yalupwilwe patanshi mu Kizungu pa Kimo mabaanga, Kapyantoto 29, 1964, kupwijilo yaba Full Gospel Business Men's Fellowship International kwajinga pa Otela wa Bellevue-Stratford ku Philadelphia, Pennsylvania, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org